

MESYUARAT KETIGA, PENGGAJ KETIGA  
PARLIMEN KEEMPAT BELAS  
2020

**HARI ISNIN : 14 DISEMBER 2020**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 8, 11,13,14, 16 HINGGA NO. 46 )**

**NOTA: [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DR. MASZLEE BIN MALIK [SIMPANG RENGAM]**

**TARIKH : 14 DISEMBER 2020 (ISNIN)**

**SOALAN**

**DR. MASZLEE BIN MALIK [SIMPANG RENGAM]** minta **MENTERI KESIHATAN** menyatakan komitmen dan perancangan pihak Kementerian untuk menaik taraf Klinik Kesihatan di Simpang Renggam agar rakyat di kawasan ini tidak perlu pergi jauh ke Hospital Kluang untuk mendapatkan rawatan dan kemudahan kesihatan yang lebih baik.

**JAWAPAN**

**Tuan Yang di-Pertua,**

1. Jabatan Kesihatan Negeri Johor sentiasa berusaha untuk menambah baik tahap kualiti perkhidmatan kesihatan di negeri Johor. Pihak Jabatan sentiasa memastikan perkhidmatan kesihatan diberikan selari dengan keperluan penduduk. Dengan itu, Jabatan sentiasa mengkaji dari masa ke semasa keperluan tambahan perkhidmatan kesihatan bagi penduduk khususnya di Simpang Renggam.
2. Klinik Kesihatan (KK) Simpang Renggam merupakan **KK jenis 3** yang mula **beroperasi pada tahun 2000**. Pelbagai perkhidmatan disediakan antaranya Kesihatan Ibu, Ante-natal dan Post-natal, Kesihatan Bayi, Kesihatan Warga Emas dan perkhidmatan bagi Pesakit Luar termasuk rawatan penyakit kronik dan penyakit berjangkit.

## SOALAN NO : 8

3. Selain itu, KK Simpang Renggam juga menyediakan **Pusat Haemodialis bagi pesakit-pesakit buah pinggang** untuk mereka menjalani dialisis. Seorang Pakar Perubatan Keluarga yang ditempatkan di sini telah membolehkan komuniti mendapat khidmat kepakaran berhampiran dengan mereka.

4. Bagi perkhidmatan kesihatan sekunder, penduduk masih perlu ke Hospital Kluang untuk mendapatkan rawatan. Jarak ke Hospital Kluang yang sejauh **32km dan anggaran perjalanan sekitar 30 minit sahaja** membolehkan penduduk mendapat akses ke perkhidmatan di hospital dengan mudah.

5. Oleh itu, setakat ini, **belum ada keperluan dan keutamaan** untuk menaiktaraf KK Simpang Renggam kerana:

- a. Klinik ini masih dapat menampung beban kedatangan harian. Purata kedatangan harian ke klinik ini adalah seramai lebih kurang **496 orang sehari (2019)**, berbanding kapasiti sebenar KK Jenis 3 yang boleh menampung lebih dari **500** orang pesakit sehari;
- b. Selain dari itu, penduduk boleh mendapatkan rawatan di KK yang berdekatan iaitu KK Rengam (13 KM), KK Layang-Layang (26 KM), KK Ayer Hitam (21KM) dan KK Mengkibol (30.6 KM);
- c. Rawatan sekunder/kes-kes yang teruk boleh dirawat di Hospital Kluang; dan
- d. Purata kedatangan sehari adalah agak stabil selama tiga (3) tahun walaupun terdapat sedikit peningkatan iaitu seramai 456 pada tahun 2017, 486 pada tahun 2018 dan 496 pada tahun 2019.

6. Namun, untuk makluman YB Simpang Renggam, walaupun belum ada keperluan untuk menaiktaraf KK Simpang Renggam ini, namun dimaklumkan bahawa sebuah Klinik Kesihatan yang baharu iaitu KK Jenis 2 Kluang telah diluluskan untuk pembinaan bermula tahun 2021 dengan

## SOALAN NO : 8

anggaran kos sebanyak RM 44 Juta. Klinik Kesihatan ini juga apabila siap kelak akan memberi perkhidmatan dengan kapasiti sehingga 800 orang sehari dan akan di tempatkan dengan Pakar Perubatan Keluarga.

7. Maka, dengan terbinanya KK Jenis 2 Kluang ini, penduduk sekitar akan mempunyai pilihan untuk mendapatkan rawatan sama ada di KK Simpang Rengam atau pun di KK Kluang yang baharu ini, sekaligus mengurangkan beban yang ditanggung oleh KK Simpang Renggam sedia ada.

8. Jabatan Kesihatan Negeri Johor sentiasa berusaha untuk menambah baik tahap kualiti perkhidmatan kesihatan di negeri Johor. Pihak Jabatan sentiasa memastikan perkhidmatan kesihatan diberikan selari dengan keperluan penduduk. Dengan itu, Jabatan sentiasa mengkaji dari masa ke semasa keperluan tambahan perkhidmatan kesihatan bagi penduduk khususnya di Simpang Renggam.

9. Klinik Kesihatan (KK) Simpang Renggam merupakan **KK jenis 3** yang mula **beroperasi pada tahun 2000**. Perkhidmatan yang diberikan adalah komprehensif; merangkumi pelbagai jenis perkhidmatan seperti perkhidmatan Ibu dan Anak, perkhidmatan Pesakit Luar, rawatan penyakit kronik dan penyakit berjangkit, selain daripada perkhidmatan sokongan seperti rehabilitasi, radiologi dan makmal primer.

10. Selain itu, di KK Simpang Renggam juga disediakan Pusat Haemodialis bagi pesakit-pesakit buah pinggang untuk mereka menjalani dialisis. Seorang Pakar Perubatan Keluarga yang ditempatkan di sini telah membolehkan komuniti mendapat khidmat kepakaran berhampiran dengan mereka.

11. Bagi perkhidmatan kesihatan sekunder, penduduk masih perlu ke Hospital Kluang untuk mendapatkan rawatan. Jarak ke Hospital Kluang yang sejauh **32km dan anggaran perjalanan sekitar 30 minit sahaja** membolehkan penduduk mendapat akses ke perkhidmatan di hospital dengan mudah.

12. Setakat ini, **tiada keperluan** untuk penaiktarafan bagi KK Simpang Renggam kerana:

- a. Klinik ini masih dapat menampung beban kedatangan harian. Purata kedatangan harian ke klinik ini adalah seramai lebih kurang **300 orang sehari**, berbanding kapasiti sebenar KK Jenis 3 yang boleh menampung **500 - 800** orang pesakit sehari;
- b. Terdapat **lapan (8) buah KK** di dalam seluruh daerah Kluang yang dapat memberikan perkhidmatan di sekitarnya; dan
- c. Rawatan sekunder/kes-kes yang teruk boleh dirawat di Hospital Kluang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI BUNG MOKTAR BIN RADIN  
[ KINABATANGAN ]**

**TARIKH : 14 DISEMBER 2020 (ISNIN)**

**SOALAN**

Minta **MENTERI PENGAJIAN TINGGI** menyatakan apakah Kementerian berhasrat untuk mengkaji semula yuran-yuran pengajian di institusi pengajian tinggi ataupun memberikan pengurangan atau pengecualian pembayaran yuran-yuran pengajian bagi membantu meringankan beban kewangan keluarga pelajar yang terjejas ekoran pandemik COVID-19.

**JAWAPAN**

**Tuan Yang di-Pertua,**

Kementerian amat prihatin dan mengambil berat terhadap keperluan para pelajar IPT untuk menjelaskan yuran pengajian mereka. Untuk makluman Ahli Yang Berhormat, secara amnya, pelajar di universiti awam (UA) hanya membayar dua hingga sepuluh peratus sahaja daripada kos sebenar program akademik manakala 90 hingga 98 peratus kos yuran pengajian dibiayai melalui subsidi oleh Kerajaan. Sebagai contoh, purata yuran bagi pengajian Sarjana Muda Perubatan di UA yang perlu dibayar oleh pelajar adalah sebanyak RM10,046.00, iaitu bersamaan dengan dua peratus daripada kos sebenar pengajian yang berjumlah RM451,929.00, manakala bakinya, sebanyak RM441,883.00 dibiayai melalui subsidi Kerajaan.

Suka saya maklumkan di sini bahawa KPT telah membuat rundingan dengan pihak Kementerian Kewangan Malaysia (MOF) bagi mengurangkan bebanan kewangan pelajar. Sebagai tanda keprihatinan, Kerajaan telah bersetuju untuk mengurangkan kadar yuran asrama, perkhidmatan dan aktiviti sehingga lima belas peratus setelah mengambil kira keupayaan kewangan Kerajaan dan UA.

Pengurangan yuran tersebut adalah bagi Semester Kedua Sesi Akademik 2019/2020 untuk pelajar warganegara Malaysia. Pengurangan yuran ini melibatkan peruntukan sebanyak RM72 juta yang mana RM20 juta merupakan peruntukan tambahan Kerajaan dan RM52 juta menggunakan sumber dalaman UA. Seramai 523,318 pelajar UA di seluruh negara dijangka mendapat manfaat daripada keputusan ini. Langkah yang sama juga telah diteruskan bagi pengajian Semester 1 Sesi 2020/2021.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SERI AHMAD FAIZAL BIN DATO' AZUMU  
[TAMBUN]**

**TARIKH : 14 DISEMBER 2020 (ISNIN)**

**SOALAN**

**DATO' SERI AHMAD FAIZAL BIN DATO' AZUMU [TAMBUN]** minta **MENTERI KESIHATAN** menyatakan:

- a. apakah status pelaksanaan Program Pemakanan Kurang Zat Makanan (PPKZM) untuk mengatasi masalah kurang nutrisi dalam kalangan orang Asal; dan
- b. apakah langkah untuk memperkasakan program ini.

**JAWAPAN**

**Tuan Yang di-Pertua,**

1. Program Pemulihan Kanak-kanak Kekurangan Zat Makanan (PPKZM) mula dilaksanakan pada tahun 1989. Sehingga Mac 2020, seramai 878 orang (20%) kanak-kanak Orang Asli dari umur enam (6) bulan hingga enam (6) tahun yang telah dikenal pasti **mengalami masalah kurang berat badan dimasukkan ke dalam program ini.** Seramai 246 orang (21.6%) kanak-kanak telah meningkat berat badan dan pulih.
2. Melalui program ini, mereka menerima **bantuan makanan asas dan multivitamin.** Setiap bulan, berat badan dan panjang/tinggi mereka

akan diambil serta lawatan ke rumah akan dilakukan oleh anggota kesihatan Kementerian Kesihatan Malaysia (KKM). Penjagaan kesihatan, pemakanan dan kebersihan diri serta persekitaran turut ditunjuk ajar.

3. Bagi memperkasakan program ini, pihak KKM sedang menyemak semula Garis Panduan PPKZM dengan mengambil kira hasil kajian keberkesanan program yang telah dijalankan pada tahun 2018 serta perbincangan bersama agensi kerajaan dan bukan Kerajaan berkenaan isu kesihatan dan pemakanan kanak-kanak Orang Asli. Satu kajian berkaitan kesihatan Orang Asli yang turut melibatkan penilaian status kesihatan kanak-kanak di bawah umur lima (5) tahun telah dirancang. Pihak KKM juga sedang merancang intervensi pemakanan yang lebih spesifik kepada kanak-kanak Orang Asli khususnya kumpulan Orang Asli *Semi-Nomadic*.

4. Pada tahun 2013, Program *Community Feeding* (PCF) juga telah diwujudkan sebagai pengukuhan kepada PPKZM. Program ini bertujuan meningkat dan mengekalkan status pemakanan kanak-kanak Orang Asli di kawasan yang mempunyai prevalens kanak-kanak kurang berat badan yang tinggi.

5. Sehingga kini, 43 buah pusat *community feeding* sedang beroperasi di kawasan pedalaman Negeri Perak, Pahang dan Kelantan. Kanak-kanak Orang Asli dari umur enam (6) bulan hingga enam (6) tahun akan diberi *Ready to Use Therapeutic Food* (RUTF), makanan tambahan dan multivitamin.

6. Sukarelawan tempatan daripada masyarakat Orang Asli dilatih bagi membantu anggota kesihatan melaksanakan aktiviti di pusat *Community Feeding* dan memberi pendidikan kesihatan kepada ibu/ bapa/ penjaga kanak-kanak menggunakan bahasa ibunda dan dialek Orang Asli.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN TEO NIE CHING [ KULAI ]**

**TARIKH : 14 DISEMBER 2020 (ISNIN)**

**SOALAN**

Minta **MENTERI PENDIDIKAN** menyatakan sama ada KPM akan terus menanggung caj pembedaan Sekolah Bantuan Kerajaan pada tahun 2021.

**JAWAPAN**

Untuk makluman Ahli Yang Berhormat, Kementerian Pendidikan Malaysia (KPM) masih menyediakan peruntukan bagi menampung bayaran caj pembedaan untuk sekolah bantuan kerajaan (SBK) pada tahun 2021. Bayaran utiliti yang ditanggung oleh KPM merangkumi bil air, elektrik dan pembedaan yang dibayar berdasarkan bil sebenar dan tidak melebihi RM5,000 sebulan untuk SBK.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN AHMAD BIN HASSAN [PAPAR]**

**TARIKH : 14 DISEMBER 2020 (ISNIN)**

**SOALAN**

Minta **PERDANA MENTERI** menyatakan pelan pelaksanaan bersasar yang sedang dirangka oleh Kerajaan menerusi NADMA untuk negeri Sabah bagi menyelesaikan masalah kelewatan penyaluran bantuan kepada mangsa-mangsa banjir, khususnya dari aspek fasiliti perlindungan sementara di negeri Sabah.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

**Tuan Yang di-Pertua,**

1. Kerajaan sentiasa bersiap siaga bagi menghadapi ketibaan Monsun Timur Laut (MTL). Saya sendiri telah mempengerusikan Mesyuarat Jawatankuasa Pengurusan Bencana Pusat Bilangan 1 Tahun 2020 pada 28 September 2020 yang dihadiri oleh wakil-wakil Kerajaan Negeri serta agensi-agensi Kerajaan yang lain. Mesyuarat ini antara lain bertujuan untuk menyelaraskan persediaan serta koordinasi di antara Kerajaan Pusat dan Kerajaan Negeri bagi menghadapi musim banjir.

2. Untuk makluman Ahli Yang Berhormat, bagi membantu Kerajaan Negeri Sabah khususnya dari aspek fasiliti perlindungan sementara di negeri Sabah, yang pertamanya, Kerajaan telah meluluskan bantuan awal kewangan sebanyak RM90,000 untuk persediaan bencana banjir dengan pengagihan seperti yang berikut:

- a) RM50,000 kepada Jawatankuasa Pengurusan Bencana Negeri (JPBN) Sabah;
- b) RM20,000 kepada setiap Jawatankuasa Pengurusan Bencana Daerah (JPBD); dan
- c) RM20,000 lagi akan diberikan kepada Angkatan Pertahanan Awam Sabah.

3. Peruntukan yang disalurkan ini boleh digunakan bagi tujuan berikut:

- a) Perbelanjaan operasi Pos Kawalan Tempat Kejadian (PKTK) dan Pusat Kawalan Operasi Bencana (PKOB);
- b) Pembelian item pakai habis seperti minyak kenderaan dan peralatan penyelenggaraan kenderaan (*wear and tear*);

- c) Perolehan barang keperluan segera di Pusat Pemindahan Sementara (PPS);
- d) Penyediaan makanan untuk petugas di PKOB, PKTK dan PPS; dan
- e) Lain-lain perbelanjaan operasi bagi tujuan melicinkan proses tindak balas sewaktu kejadian bencana sama ada kepada agensi kerajaan, pertubuhan bukan kerajaan (NGO) atau kepada mangsa-mangsa bencana.

4. Kedua, pihak NADMA telah menghantar sebanyak 783 unit *cubicle tent* untuk kegunaan mangsa-mangsa bencana banjir di pusat-pusat pemindahan dan sebanyak 2,500 unit lagi akan dihantar kemudian. Ketiga, pihak NADMA akan menghantar sebanyak 2,000 unit kit makanan sebelum MTL 2020 / 2021 diramalkan bermula pada Januari 2021 di Negeri Sabah.

5. Selebihnya, JPBN Sabah dan setiap JPBD perlu menggembelngkan aset dan agensi-agensi tindak balas dengan bantuan atau sokongan badan korporat, pertubuhan bukan kerajaan dan komuniti di peringkat tempatan selaras dengan peranan dan tanggungjawab dalam kitaran bencana seperti yang telah dinyatakan dalam arahan No. 20 Majlis Keselamatan Negara: Dasar dan Mekanisme Pengurusan Bencana Negara.

6. Pihak NADMA akan terus bekerjasama rapat dengan Jawatankuasa Pengurusan Bencana Negeri Sabah, Angkatan Pertahanan Awam Sabah dan lain-lain agensi berkaitan melalui sesi-sesi libat urus, simulasi bencana, pembinaan kapasiti komuniti dan perbincangan untuk meningkatkan ketahanan semua pihak terhadap bencana.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK MOHAMAD BIN ALAMIN [ KIMANIS ]**

**TARIKH : 14 DISEMBER 2020 (ISNIN)**

**SOALAN**

**DATUK MOHAMAD BIN ALAMIN [ KIMANIS ]** minta **MENTERI KESIHATAN** menyatakan sejauh manakah Kementerian bekerjasama dengan Jabatan Perlindungan Data Peribadi (JPDP) membuat pemantauan dan pengawalan pada data peribadi yang dicatatkan secara manual di dalam buku di premis perniagaan di seluruh Malaysia selain daripada pendaftaran melalui aplikasi MySejahtera supaya menyekat pihak ketiga tidak menyalahgunakan data peribadi tersebut.

**JAWAPAN**

**Tuan Yang Dipertua,**

1. Pemantauan data peribadi yang dicatatkan secara manual di dalam buku di premis perniagaan adalah di bawah tanggungjawab pihak Jabatan Perlindungan Data Peribadi (JPDP). Pihak JPDP pada 29 Mei 2020 juga telah mengeluarkan **tatacara pengendalian** bagi pengumpulan, pemprosesan dan penyimpanan data peribadi oleh pemilik premis perniagaan semasa Perintah Kawalan Pergerakan Bersyarat (PKPB). Tatacara ini antara lain telah menggariskan perkara-perkara seperti berikut:

- a. premis perniagaan hanya perlu merekodkan **nama, nombor telefon, tarikh dan masa** kehadiran pengunjung;

## SOALAN NO : 17

- b. kaedah pengumpulan data peribadi adalah tertakluk kepada premis perniagaan (**secara manual atau pun digital**);
  - c. paparan **notis yang jelas** mengenai tujuan pengumpulan data peribadi;
  - d. data peribadi yang dikumpul hanya digunakan **untuk tujuan pengesanan kontak selaras dengan Akta Pencegahan dan Pengawalan Penyakit Berjangkit 1988** (Akta 342);
  - e. tempoh masa penyimpanan data peribadi yang dikumpul adalah **sehingga selepas 6 bulan Perintah Kawalan Pergerakan (PKP) ditamatkan** dan mesti dimusnahkan atau dipadam secara kekal; dan
  - f. premis perniagaan perlu memastikan data peribadi yang dikumpul adalah **tepat dan tidak mengelirukan**.
2. Sehingga 1 Oktober 2020, sebanyak 804 pemeriksaan terhadap premis perniagaan telah pun dijalankan oleh Bahagian Penguatkuasaan, JPDP di seluruh negara. Pemeriksaan yang dilaksanakan adalah merangkumi pelbagai sektor termasuk kesihatan, peruncitan, pajak gadai, telekomunikasi dan lain-lain.

Sekian, terima kasih.



**PEMBERITAHUAN PERTANYAAN JAWAB LISAN  
DEWAN RAKYAT MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATUK SERI DR. MUJAHID BIN YUSOF  
RAWA [ PARIT BUNTAR ]**

**TARIKH : 14 DISEMBER 2020 (ISNIN)**

**SOALAN**

**DATUK SERI DR. MUJAHID BIN YUSOF RAWA [ PARIT BUNTAR ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah usaha Kementerian semasa untuk menangani masalah perkahwinan bawah umur terutamanya apabila perkahwinan bawah umur ini melibatkan masalah kemiskinan dan keciciran pendidikan.

**JAWAPAN**

**Tuan Yang di-Pertua,**

Seperti mana Yang Berhormat sedia maklum, Pelan Strategi Kebangsaan Menangani Perkahwinan Bawah Umur telah menggariskan usaha-usaha serta strategi untuk menangani punca perkahwinan bawah umur. Antara punca yang telah dikenal pasti adalah kemiskinan dan keciciran dalam pendidikan.

Dalam Pelan tersebut, antara strategi yang telah dikenal pasti bagi menangani kemiskinan adalah menyediakan bantuan kewangan mengikut kumpulan umur kanak-kanak, meningkatkan akses kumpulan B40 kepada pengasuhan dan pendidikan awal kanak-kanak, serta memperkukuhkan penyelarasan dan penumpuan kepada sokongan sosioekonomi dan program jangkauan (*outreach*) sedia ada.

Pelan itu turut menyentuh tentang usaha Kerajaan untuk menangani isu keciciran daripada pendidikan dengan merangka empat (4) strategi iaitu meningkatkan kesedaran ibu bapa tentang kepentingan pendidikan terhadap kanak-kanak, menambah baik sistem perundangan mengenai pendidikan sedia ada, menambah baik dasar dan juga perundangan mengenai pendidikan, serta mempertingkatkan sistem sokongan bagi menangani isu kekurangan akses kepada pendidikan dan kehadiran ke sekolah yang rendah yang menjadi salah satu penyumbang kepada perkahwinan bawah umur.

Dalam hal ini, Kementerian Kewangan, Kementerian Pembangunan Luar Bandar, Kementerian Pendidikan, Kementerian Belia dan Sukan, Jabatan Kebajikan Masyarakat, Jabatan Pembangunan Wanita, serta Unit Penyelarasan Pelaksanaan, Jabatan Perdana Menteri merupakan antara kementerian dan agensi yang terlibat dalam usaha menangani masalah kemiskinan dan keciciran dalam pendidikan seperti yang telah dinyatakan dalam Pelan ini.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB DATO' SERI TIONG KING SING**  
**KAWASAN : BINTULU**  
**TARIKH : 14 DISEMBER 2020 (ISNIN)**

**SOALAN NO. 19**

minta **MENTERI KANAN KERJA RAYA** menyatakan:

- (a) apakah langkah proaktif dalam memantau serta tindakan untuk menyelenggara dan memperbaiki keadaan kerosakan jalan raya yang berlubang atau rosak; dan
- (b) apakah piawaian yang telah ditetapkan oleh Kementerian bagi melantik kontraktor yang berkecualan dalam melaksanakan projek memperbaiki jalan raya.

**JAWAPAN**

Tuan Yang Di-Pertua,

Untuk makluman Ahli-Ahli Yang Berhormat, Kementerian Kerja Raya sentiasa berusaha dari semasa ke semasa untuk memastikan jalan persekutuan di negara ini berada dalam keadaan selamat dan selesa. Syarikat konsesi yang dilantik melalui perjanjian penswastaan di bawah skop Kerja Penyelenggaraan Rutin perlu melakukan rondaan Pemeriksaan Rutin Jalan Persekutuan dengan kekerapan 2 kali seminggu. Ini adalah untuk memastikan jika terdapat sebarang kerosakan jalan seperti jalan berlubang, kerja tampalan lubang sementara hendaklah dilaksanakan dalam tempoh 24 jam dan tampalan kekal dalam tempoh 3 hari. Penekanan ini telah diterjemahkan melalui Program Aku Janji Sifar Lubang (Zero Pothole) antara pihak KKR dengan pihak konsesi penyelenggaraan Jalan Persekutuan seluruh Malaysia.

Untuk makluman Ahli Yang Berhormat juga, bagi membaikpulih jalan-jalan dalam status kritikal, Kementerian Kerja Raya menyediakan program penyelenggaraan turapan berdasarkan notis kerosakan (Notice of Defects / NOD) yang disediakan oleh syarikat konsesi penyelenggaraan jalan persekutuan. Melalui NOD ini, Kementerian Kerja Raya akan menyenaraikan program penyelenggaraan turapan ini mengikut keutamaan dan keperluan mendesak untuk dikemukakan kepada Kementerian Kewangan bagi kelulusan peruntukan. Pelaksanaan program penyelenggaraan ini adalah tertakluk kepada kelulusan peruntukan dari Kementerian Kewangan.

Untuk makluman Ahli-Ahli Yang Berhormat, kerja-kerja penyelenggaraan Jalan Persekutuan di seluruh Malaysia dilaksanakan oleh pihak konsesi yang telah dilantik oleh Kementerian Kerja Raya. Pelaksanaan kerja-kerja penyelenggaraan ini adalah di bawah pengawasan sepenuhnya oleh pihak JKR Malaysia, JKR Sabah dan JKR Sarawak iaitu pihak yang telah dilantik sebagai wakil kerajaan. Pemilihan kontraktor oleh pihak konsesi

**NO SOALAN : 19**

bagi kerja-kerja penyenggaraan jalan hanya terhad kepada kontraktor tempatan yang berkelayakan dan berdaftar dengan CIDB.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN RAMKARPAL SINGH A/L KARPAL  
SINGH [ BUKIT GELUGOR ]**

**TARIKH : 14 DISEMBER 2020 (ISNIN)**

**SOALAN**

**TUAN RAMKARPAL SINGH A/L KARPAL SINGH [ BUKIT GELUGOR ]** minta **MENTERI KESIHATAN** menyatakan langkah-langkah yang diambil oleh Kementerian bagi menangani masalah depresi dalam kalangan rakyat Malaysia yang baru-baru ini dilaporkan hampir setengah juta rakyat Malaysia yang mengalami simptom tekanan atau depresi menurut Tinjauan Kebangsaan Kesihatan dan Morbiditi (NHMS) 2019.

**JAWAPAN**

**Tuan Yang di-Pertua,**

1. Kajian Kesihatan dan Morbiditi Kebangsaan yang dilaksanakan oleh KKM pada tahun 2019 mendapati bahawa prevalen kemurungan (*depression*) iaitu salah satu daripada penyakit mental dalam kalangan masyarakat Malaysia berumur 16 tahun dan ke atas adalah 2.3% dan ini menghampiri setengah juta rakyat Malaysia (16 tahun dan ke atas).
2. Justeru, langkah-langkah yang dilaksanakan oleh Kementerian Kesihatan bagi menangani masalah kesihatan mental termasuk kemurungan dalam kalangan rakyat Malaysia adalah seperti berikut;

a. Program promosi kesihatan mental dan pencegahan:

- i. KKM telah melaksanakan Kempen kesedaran kesihatan mental '**Let's Talk Minda Sihat**', yang merupakan satu inisiatif ini melibatkan gabungan usaha-usaha pelbagai agensi kerajaan dan bukan kerajaan dalam usaha menghapuskan stigma terhadap kesihatan mental dan penyakit mental, meningkatkan tingkah laku mendapatkan bantuan bagi permasalahan yang dihadapi; dan
- ii. Kementerian Kesihatan berkolaborasi dengan Kementerian Pelajaran untuk melaksanakan **Program Minda Sihat Sekolah** semenjak 2011. Program ini melibatkan saringan bagi mengenalpasti awal tahap stres, keresahan dan kemurungan murid-murid sekolah dan mereka yang dikenalpasti akan diberikan intervensi dan rawatan bersesuaian. Setakat ini, sebanyak 3440 buah sekolah menengah dan 7780 buah sekolah rendah telah melaksanakan Program Minda Sihat ini.
- iii. **Inisiatif Program KOSPEN dan KOSPEN PLUS (Komuniti Sihat Pembina Negara)** yang merupakan program bagi mempertingkatkan kemahiran menangani stres dalam kalangan komuniti dan warga kerja, antara perkhidmatan yang dikendalikan di bawah program ini adalah saringan, promosi serta rujukan bagi klien yang memerlukan bantuan kepakaran.

b. Perkhidmatan saringan dan rawatan:

- i. Kementerian Kesihatan (KKM) menyediakan perkhidmatan kesihatan mental di 1,001 klinik kesihatan di seluruh negara. Antara perkhidmatan yang disediakan termasuklah promosi, saringan dan pengesanan awal serta pengurusan kes

berkaitan kemurungan dan cubaan bunuh diri oleh pakar perubatan keluarga.

- ii. Perkhidmatan **rawatan psikiatri di empat (4) buah institusi mental** dan **66 buah hospital KKM** di seluruh Malaysia yang menawarkan rawatan dan intervensi psikiatri, serta pengesanan awal kepada individu-individu yang disyaki mengalami masalah kesihatan mental dan penyakit mental termasuk kemurungan.
- iii. KKM menyediakan **28 Pusat Kesihatan Mental Komuniti (MENTARI)** yang menawarkan perkhidmatan pesakit luar, perkhidmatan psikiatri komuniti dan perkhidmatan rehabilitasi.

**c. Perkhidmatan kesihatan mental dan sokongan psikososial**

- i. Di peringkat daerah, hospital dan klinik kesihatan, perkhidmatan Kesihatan Mental dan Sokongan Psikososial atau MHPSS (Mental Health Psychosocial Support Service) turut disediakan melalui Pasukan Kesihatan Mental dan Sokongan Psikososial bagi kumpulan sasaran yang memerlukan semasa bencana atau wabak. Pasukan ini terdiri daripada pakar-pakar perubatan, pegawai perubatan, kaunselor dan paramedik.
- ii. KKM dengan kerjasama MERCY Malaysia telah mewujudkan perkhidmatan talian bantuan sokongan psikososial yang dikendalikan oleh pegawai psikologi kaunselling serta sukarelawan dan NGO bagi memberikan perkhidmatan sokongan psikososial dan kaunseling kepada komuniti/masyarakat yang mengalami kesan emosi dan kemurungan. Selain itu, agensi kerajaan lain seperti Jabatan Kemajuan Islam Malaysia (JAKIM) dan Kementerian Pembangunan Wanita, Keluarga dan Masyarakat (KPWKM) juga turut mewujudkan talian bantuan sokongan. Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DR. MASZLEE BIN MALIK  
[ SIMPANG RENGAM ]**

**TARIKH : 14 DISEMBER 2020 (ISNIN)**

**SOALAN**

Minta **MENTERI PENGAJIAN TINGGI** menyatakan status pelaksanaan pembentukan Kesatuan Pelajar (Student Union) di Institut Pengajian Tinggi Awam.

**JAWAPAN**

**Tuan Yang di-Pertua,**

Kementerian Pengajian Tinggi (KPT) sentiasa komited untuk meningkatkan keterlibatan pelajar (*student empowerment*) dalam mencorak dan menentukan hala tuju pembangunan negara, berpandukan peruntukan Akta Universiti dan Kolej Universiti (AUKU) 1971.

Terdapat pelbagai inisiatif yang telah dan sedang dilaksanakan oleh Kementerian bagi memperkasa dan meningkatkan keterlibatan pelajar untuk menyuarakan pandangan mereka, antaranya adalah:

- (i) Melaksanakan Pilihan Raya Kampus (PRK) pada setiap tahun dengan penglibatan pelajar sepenuhnya sama ada dalam pengurusan perjalanan pilihan raya mahupun sebagai calon yang bertanding;
- (ii) Meletakkan kelab dan persatuan pelajar di sesebuah IPT untuk bernaung di bawah Majlis Perwakilan Pelajar (MPP) bagi memperkasakan lagi peranan MPP;

- (iii) Memberikan tanggungjawab kepada MPP untuk menguruskan kewangan bagi aktiviti pelajar; meluluskan permohonan program pelajar dan menjalankan pemantauan ke atas aktiviti kelab dan persatuan yang bernaung dibawahnya; dan

Untuk makluman Ahli Yang Berhormat, Universiti Sains Malaysia (USM) merupakan antara UA yang terawal mewujudkan peruntukan yang lebih terperinci bagi Kesatuan Pelajar mereka. Perlembagaan bagi Kesatuan yang dinamakan sebagai Dewan Perundangan Pelajar telah diwartakan pada tahun 2011.

Selain itu, Majlis Perwakilan Pelajar (MPP), Universiti Malaya (UM) dan Universiti Kebangsaan Malaysia (UKM) juga telah dinaik taraf kepada Kesatuan Mahasiswa UM dan Kesatuan Mahasiswa UKM, masing-masing pada Mac dan Disember 2019. Universiti Islam Antarabangsa Malaysia (UIAM) pula telah menubuhkan Kesatuan Pelajar UIAM dan telah didaftarkan di Jabatan Pendaftaran Pertubuhan Malaysia (ROS) pada Oktober 2019.

Kementerian dari semasa ke semasa mengadakan perbincangan dengan pengurusan universiti awam dalam merealisasikan pembentukan Kesatuan-kesatuan Pelajar di universiti masing-masing. Selain itu, Kementerian turut mengadakan sesi libat urus secara berterusan bersama perwakilan pelajar bagi mendapatkan pandangan dan menilai keperluan semasa mereka. Melalui sesi sebegini, isu-isu kebajikan dan kesejahteraan pelajar dapat ditangani dengan tuntas di samping menjadi platform bagi mahasiswa mengemukakan pandangan dan hasrat mereka kepada IPT dan juga kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI RICHARD RIOT ANAK JAEM  
[ SERIAN ]**

**TARIKH : 14 DISEMBER 2020 (ISNIN)**

**SOALAN**

Minta **MENTERI PENDIDIKAN** menyatakan apakah pandangan Kementerian tentang cadangan negeri Sarawak untuk menubuhkan lima buah (5) '*International School*'.

**JAWAPAN**

**Tuan Yang di-Pertua,**

Untuk makluman Ahli Yang Berhormat, berdasarkan Seksyen 15 Akta Pendidikan 1996 [Akta 550], sekolah antarabangsa adalah di luar daripada sistem pendidikan kebangsaan.

Dalam konteks penubuhan sekolah antarabangsa, Kementerian Pendidikan Malaysia (KPM) tiada halangan sekiranya terdapat cadangan untuk menubuhkan sekolah antarabangsa oleh mana-mana pihak termasuk kerajaan Negeri Sarawak tertakluk kepada syarat dan prosedur yang telah ditetapkan oleh KPM, antaranya:

- (i) pemilikan oleh sebuah syarikat sendirian berhad yang berdaftar dengan Suruhanjaya Syarikat Malaysia dengan modal berbayar sekurang-kurangnya RM1 juta;
- (ii) cadangan premis dengan keluasan binaan sekurang-kurangnya 25 ribu kaki persegi dan 15 buah bilik darjah bagi sekolah

antarabangsa peringkat menengah. Premis juga perlu mendapat sokongan daripada tiga agensi iaitu Pihak Berkuasa Tempatan, Jabatan Bomba dan Penyelamat serta Pejabat Kesihatan;

- (iii) mendapat kebenaran melaksanakan kurikulum antarabangsa dan pentaksiran daripada badan peperiksaan yang berkaitan; dan
- (iv) mempunyai kemudahan pengajaran dan pembelajaran yang mencukupi mengikut ketetapan kurikulum yang digunakan.

Berdasarkan peruntukan Seksyen 79 Akta 550, semua institusi pendidikan hendaklah berdaftar di bawah Akta 550 serta mematuhi semua peruntukan dan peraturan yang berkaitan termasuklah institusi pendidikan yang ditubuhkan oleh kerajaan negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**  
**DARIPADA : DATO' SERI DR. AHMAD ZAHID BIN  
HAMIDI [ BAGAN DATUK ]**  
**TARIKH : 14 DISEMBER 2020 ( ISNIN )**

**SOALAN**

Minta **MENTERI PENGAJIAN TINGGI** menyatakan apakah status kesihatan dan kebajikan pelajar-pelajar Malaysia di luar negara dan bagaimanakah pihak Kementerian dapat membantu mereka terutamanya pelajar yang berada di negara yang terkesan teruk dengan pandemik COVID-19.

**JAWAPAN**

**Tuan Yang di-Pertua,**

Penularan wabak jangkitan COVID-19 yang sedang melanda global sekarang ini menjadi isu dan cabaran utama bukan sahaja kepada Kerajaan Malaysia tetapi juga di seluruh dunia. Kementerian Pengajian Tinggi (KPT) amat prihatin dengan keadaan semua pelajar Malaysia di luar negara dan sentiasa berhubung rapat dengan mereka melalui pemantauan yang dilakukan oleh pejabat Education Malaysia (EM) Luar Negara dan juga pihak kedutaan. Sehingga kini, status kesihatan kesemua pelajar Malaysia di luar negara adalah dalam keadaan yang terkawal.

Berikut adalah antara tindakan pemantauan yang telah diambil bagi memastikan kebajikan pelajar Malaysia di luar negara dan sentiasa dalam keadaan yang baik:

- (a) Bermula pada bulan April 2020, Bilik Gerakan COVID-19 KPT telah diaktifkan bagi membantu para pelajar Malaysia yang berada di luar

negara yang memerlukan bantuan dan maklumat berkaitan status terkini penularan pandemik COVID-19;

- (b) EM Luar Negara juga telah mewujudkan platform khas secara dalam talian bagi tujuan komunikasi, pemantauan serta memastikan kebajikan pelajar terjamin. Ini bagi membolehkan bantuan segera dapat disalurkan kepada para pelajar dalam keadaan kecemasan. Bantuan ini termasuklah khidmat kaunseling; penyediaan keperluan asas seperti *health packs* yang mengandungi pelitup muka dan cecair pensanitasi tangan; serta bantuan kecemasan kepada pelajar-pelajar Malaysia yang perlu menjalani kuarantin sendiri wajib;
- (c) Memantau keadaan psikologi pelajar dari semasa ke semasa melalui penganjuran program berkaitan kesihatan mental. Contoh program yang telah dilaksanakan termasuklah program *Mental Health Stimulus for Students' Welfare* yang telah dilaksanakan oleh Pejabat Education Malaysia Washington DC pada 19 April 2020, dan program Kaunseling Kelompok SeJordan yang dijangka diadakan oleh Pejabat Education Malaysia Jordan pada bulan Disember 2020; dan
- (d) Menyediakan kemudahan tabung amanah kebajikan pelajar untuk disalurkan kepada pelajar yang memerlukan bantuan kewangan untuk tujuan kecemasan.

Selain daripada usaha-usaha di atas, aspek pengurusan akademik pelajar turut disantuni. Pihak KPT telah mengadakan beberapa siri libat urus dengan pihak kedutaan negara-negara yang terlibat bagi menyelesaikan masalah para pelajar yang terkesan dengan isu penangguhan peperiksaan dan pengajian. Pihak KPT turut membantu dalam menyelaras urusan penerbangan para pelajar yang ingin kembali ke Malaysia. Maklumat dan bantuan lanjut juga telah disalurkan kepada para pelajar yang tidak dapat meneruskan pengajian di luar negara dengan menguruskan pemindahan kredit pelajar-pelajar yang terlibat agar mereka dapat meneruskan pengajian di IPT dalam negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN SIM CHEE KEONG  
[ BUKIT MERTA JAM ]**

**TARIKH : 14 DISEMBER 2020 (ISNIN)**

**SOALAN**

Minta **PERDANA MENTERI** menyatakan sebab mengapa hanya individu pulang dari Sabah bermula 27 September 2020 perlu menjalani saringan COVID-19, sedangkan ramai yang pulang sebelum itu berisiko tinggi dan mengapa tempoh kuarantin sendiri di rumah yang dikenakan kurang daripada 14 hari.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

**Tuan Yang Dipertua,**

1. Kebanyakan dasar dan tindakan mengenai pengawalan dan pembendungan penularan COVID-19 adalah mengikut nasihat Kementerian Kesihatan Malaysia (KKM). Untuk makluman Ahli Yang Berhormat, **mulai 8 Disember 2020**, individu dari Sabah yang ingin ke Semenanjung perlu menjalani ujian RT-PCR atau RTK-Ag COVID-19, 3 hari sebelum berlepas dari Sabah. Hanya individu yang tidak bergejala dengan keputusan ujian negatif sahaja yang akan dibenarkan untuk meneruskan perjalanan mereka ke Semenanjung Malaysia.
2. Dasar kerajaan telah menetapkan bahawa hanya **individu yang pulang dari luar negara** perlu menjalani kuarantin wajib di Pusat Kuarantin selama 14 hari. Kerajaan tidak mengambil dasar mewajibkan mereka yang pulang dari Sabah untuk menjalani kuarantin wajib 14 hari di pusat kuarantin kerana dasar tersebut sekiranya diambil, hendaklah juga terpakai kepada semua negeri atau kawasan dalam Malaysia.
3. Mengambil contoh negeri Kedah umpamanya pada satu ketika sebelum penularan di Sabah pernah menjadi zon merah akibat penularan COVID-19 berpunca daripada kluster 'Siva Gangga', maka jika pendekatan kuarantin wajib 14 hari diambil, semua yang datang dari Negeri Kedah juga perlu di kuarantin wajib. Langkah ini dilihat tidak praktikal selain di luar kemampuan perkhidmatan kesihatan untuk melaksanakannya.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AHMAD TARMIZI BIN SULAIMAN [ SIK ]**

**TARIKH : 14 DISEMBER 2020 (ISNIN)**

**SOALAN**

Minta **MENTERI PENDIDIKAN** menyatakan perancangan untuk membangunkan pelan jaringan internet yang lebih baik di kawasan pedalaman khususnya di daerah Sik bagi memudahkan urusan pengajian atas talian pelajar sekolah dan universiti.

**JAWAPAN**

**Tuan Yang di-Pertua,**

Bermula tahun hadapan, KPM akan menaik taraf capaian Internet jalur lebar di semua sekolah daripada kelajuan 30Mbps hingga 100Mbps, ke kelajuan 100Mbps hingga 800Mbps bergantung kepada saiz sekolah melalui inisiatif rangkaian bersepadu Sektor Awam MyGov\*Net yang disediakan oleh MAMPU.

Bagi 141 buah sekolah di pedalaman yang tidak mempunyai capaian Internet melalui jalur lebar, KPM sedang dalam usaha menyediakan capaian Internet melalui teknologi *Very Small Aperture Terminal* (VSAT) berkelajuan 30Mbps yang dijangka siap pada Februari 2021. Khusus bagi 32 buah sekolah KPM di PPD Sik, lima (5) sekolah berada di kawasan bandar manakala 27 sekolah berada di kawasan luar bandar, KPM telah menyediakan capaian Internet jalur lebar di kesemua sekolah berkenaan. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SABRI BIN AZIT [ JERAJ ]**

**TARIKH : 14 DISEMBER 2020 (ISNIN)**

**SOALAN**

Minta **MENTERI PENDIDIKAN** menyatakan langkah-langkah yang komprehensif bagi memartabatkan tulisan Jawi melalui Dewan Bahasa dan Pustaka.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) melalui Dewan Bahasa dan Pustaka (DBP) mendukung penuh aspirasi dalam usaha pemartabatan tulisan Jawi. Pemartabatan tulisan Jawi secara jelas termaktub dalam Akta Bahasa Kebangsaan 1963/67 (Akta 32) yang menyatakan bahawa tulisan Jawi merupakan tulisan bagi bahasa kebangsaan di samping tulisan Rumi.

Untuk makluman Ahli Yang Berhormat, DBP memberi perhatian ke atas usaha untuk memartabatkan dan menyemarakkan penggunaan tulisan Jawi melalui pelaksanaan langkah-langkah komprehensif seperti yang berikut:

- a) Merangka pelaksanaan Pelan Induk Memperkasakan Jawi dengan beberapa pihak yang berkepentingan demi menjamin tulisan Jawi terus dilestarikan dan mempunyai hala tuju serta dilakukan secara berterusan;

- b) Menerbitkan buku pedoman sebagai rujukan. Antaranya termasuklah Pedoman Umum Ejaan Jawi Bahasa Melayu Dewan. Selain itu, terdapat juga buku pedoman lain seperti Daftar Kata Bahasa Melayu Rumi-Sebutan-Jawi dan Panduan Menulis dan Mengeja Jawi (Edisi Kedua) serta bahan ilmiah lain seperti Sejarah Perkembangan Tulisan Jawi dan Pendekatan Pengajaran Jawi;
- c) Menanamkan kesedaran berkaitan kepentingan tulisan Jawi menerusi program pemupukan dan penggalakan. Menerusi program ini, DBP telah mentauliahkan 71 orang Munsyi Dewan (Jawi) dalam kalangan penggiat tulisan Jawi yang berperanan sebagai pakar rujuk tulisan Jawi di seluruh negara;
- d) Menyediakan perkhidmatan penyemakan dan pengesahan tulisan Jawi bagi negeri-negeri yang mewajibkan tulisan Jawi dalam iklan, penamaan bangunan dan nama jalan. Antara negeri yang telah mengeluarkan arahan penggunaan tulisan Jawi termasuklah Johor, Selangor, Melaka, Kelantan, Terengganu, Pahang, Kedah dan Perlis. Sebagai rekod, bermula tahun 2017 hingga November 2020, DBP telah menyemak sebanyak 10 299 iklan yang menggunakan tulisan Jawi;
- e) Mengadakan kerjasama dengan agensi lain untuk mengadakan Kempen Jawi seperti Karnival Semarak Jawi dan Seminar Seni Khat Melayu; dan
- f) Menerbitkan siri bacaan yang menggunakan tulisan Jawi. DBP juga menyediakan ruangan penulisan yang menggunakan tulisan Jawi dalam beberapa majalah terbitannya seperti majalah Dewan Bahasa, Dewan Pelajar, Pelita Bahasa dan Dewan Tamadun Islam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DR. ONG KIAN MING [ BANGI ]**

**TARIKH : 14 DISEMBER 2020 (ISNIN)**

**SOALAN**

**DR. ONG KIAN MING [ BANGI ]** minta **PERDANA MENTERI** menyatakan sama ada undi pos boleh digunakan oleh pengundi Sarawak yang bekerja dan belajar di Semenanjung Malaysia dan Sabah di Pilihan Raya Negeri Sarawak memandangkan situasi COVID-19 yang mungkin belum lagi terkawal bila PRN Sarawak diadakan tahun ini atau tahun depan.

**JAWAPAN**

**YB DATO' TAKIYUDDIN BIN HASSAN, MENTERI DI JABATAN  
PERDANA MENTERI (PARLIMEN DAN UNDANG-UNDANG)**

**Tuan Yang di-Pertua,**

Untuk makluman Ahli Yang Berhormat, Perkara 119 Perlembagaan Persekutuan menetapkan salah satu kelayakan untuk didaftarkan sebagai pemilih ialah bermastautin dalam mana-mana Bahagian Pilihan Raya. Bagi maksud tersebut, SPR menentukan Bahagian Pilihan Raya seseorang pemilih berdasarkan kepada alamat pemastautin pemilih seperti di kad pengenalan.

Pada masa ini, SPR tidak bercadang untuk memberikan kemudahan undi pos kepada pengundi Sarawak yang berada di luar Sarawak sama ada di Semenanjung atau Sabah bagi pelaksanaan Pilihan Raya Umum Negeri Sarawak Ke-12 yang akan datang. Kemudahan mengundi secara pos hanya diberikan kepada pengundi dalam kategori seperti berikut:

- i. Ahli SPR dan kakitangan SPR;
- ii. Petugas pilihan raya;
- iii. Tentera, Polis, Polis Pasukan Gerak Am (PGA) yang bertugas pada Hari Mengundi Awal;
- iv. Pengamal media yang bertugas membuat liputan pilihan raya di luar kawasan pada Hari Mengundi;
- v. Kakitangan bagi sembilan Agensi iaitu Jabatan Bomba dan Penyelamat Malaysia, Jabatan Penjara Malaysia, Agensi Penguatkuasaan Maritim Malaysia, Sukarelawan Simpanan Polis, Jabatan Imigresen Malaysia, Jabatan Kesihatan Malaysia, Jabatan Pendaftaran Negara-UTC, Angkatan Pertahanan Awam Malaysia, Agensi Pengurusan Bencana Negara) yang bertugas pada Hari Mengundi;
- vi. Pengundi Malaysia yang berada di luar negara (kecuali Brunei, Singapura, Kalimantan dan Selatan Thai); dan
- vii. Pengundi Tidak Hadir (PTH) luar negara iaitu penjawat awam yang berkhidmat di luar negara dan pasangan serta pelajar universiti/institusi pengajian tinggi sepenuh masa di luar negara dan pasangan.

Dalam hal ini, SPR menggalakkan pengundi untuk memohon pertukaran Bahagian Pilihan Raya berdasarkan tempat bermastautin terkini bagi memudahkan urusan pengundian bagi suatu pilihan raya umum atau kecil.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' NGEH KOO HAM [BERUAS]**

**TARIKH : 14 DISEMBER 2020 (ISNIN)**

**SOALAN**

**DATO' NGEH KOO HAM [ BERUAS ]** minta **PERDANA MENTERI** menyatakan mengapa Kerajaan tidak mengatur untuk Usul Tidak Percaya terhadap beliau disenaraikan sebagai urusan pertama Parlimen, satu perkara yang lumrah/konvensyen dalam sistem demokrasi berparlimen.

**JAWAPAN**

**YB DATO' TAKIYUDDIN BIN HASSAN, MENTERI DI JABATAN  
PERDANA MENTERI (PARLIMEN DAN UNDANG-UNDANG)**

**Tuan Yang di-Pertua,**

Untuk makluman Ahli Yang Berhormat, selaras dengan Peraturan Mesyuarat 15(1) Peraturan-peraturan Majlis Mesyuarat Dewan Rakyat, pada tiap-tiap hari persidangan mesyuarat, urusan Kerajaan hendaklah didahulukan daripada urusan-urusan lain. Sehubungan dengan itu, urusan-urusan lain termasuk usul persendirian hanya akan dibahaskan selepas semua urusan Kerajaan selesai.

Sekian, terima kasih.

PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA  
PARLIMEN KEEMPAT BELAS

PERTANYAAN : LISAN

DARIPADA : DR. ONG KIAN MING [ BANGI ]

TARIKH : 14 DISEMBER 2020 (ISNIN)

**SOALAN**

DR. ONG KIAN MING [ BANGI ] minta MENTERI KESIHATAN menyatakan metodologi yang digunakan untuk menentukan sama ada satu mukim/zon diklasifikasi sebagai zon merah, kuning dan hijau (misalnya, adakah ia berdasarkan jumlah kes aktif yang sedang dirawat, jumlah kes baru dalam masa 2 minggu terkini, sebagai contoh).

**JAWAPAN**

Tuan Yang di-Pertua,

1. Kaedah klasifikasi zon warna sesebuah daerah, mukim, presint atau zon adalah berdasarkan jumlah kes COVID-19 dalam tempoh 14 hari kebelakangan. Ia adalah asas kepada **District Risk Reduction Program (DRRP)** sebagai panduan kepada komuniti untuk bersama-sama mengambil tindakan bersama pihak Kerajaan di kawasan setempat.
2. Walau bagaimanapun, kaedah penentuan zon jangkitan COVID-19, bukan hanya bergantung kepada DRRP. Ia juga **mengambilkira risiko jangkitan COVID-19** dalam sesuatu kawasan. Beberapa kriteria diambilkira dalam penentuan risiko ini iaitu:
  - a. **peningkatan kes secara mendadak** dalam tempoh masa singkat yang menggambarkan kadar penularan jangkitan yang cepat;
  - b. **taburan kes positif**, sama ada bertumpu atau bertaburan;

## SOALAN NO : 29

- c. **peratusan bilangan kes asimptomatik yang tinggi** kerana ia berkemungkinan akan menyebabkan penularan tanpa sedar oleh kes terbabit;
  - d. **kepadatan penduduk di kawasan terlibat**, kerana kawasan yang padat akan meningkatkan risiko penularan jangkitan;
  - e. **sosiodemografi setempat**; seperti terdapat penduduk bukan warganegara di lokaliti, mobilisasi penduduk merentas mukim atau daerah atau negeri kerana keperluan bekerja atau bersekolah, terdapat lorong-lorong tikus bagi kemasukan bukan warganegara dan sebagainya;
  - f. terdapatnya **infrastruktur gunasama** di lokaliti seperti pasar, pasaraya, sekolah, rumah ibadat dan sebagainya. Premis sedemikian merupakan tempat perkumpulan ramai;
  - g. **jenis tempat tinggal** kes COVID-19 yang juga berkait dengan kepadatan penduduk berisiko; dan
  - h. terdapat **sejarah perkumpulan beramai-ramai di lokaliti** dalam tempoh semasa kes mula dikesan.
3. Selain itu, kita juga melihat tindakan yang telah diambil bagi mengukur impak kepada kesihatan setempat, seperti:
- a. bilangan kontak rapat yang dikaitkan dengan kes telah dapat dikenalpasti;
  - b. bilangan yang diberi perintah pengawasan dan pemerhatian termasuk yang dihantar ke stesen kuarantin; dan
  - c. bilangan penduduk yang terlibat dan sebagainya. Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK MOHAMADDIN BIN KETAPI [LAHAD DATU]**

**TARIKH : 14 DISEMBER 2020 (ISNIN)**

**SOALAN**

Minta **PERDANA MENTERI** menyatakan jumlah peserta e-Kasih di Parlimen Lahad Datu dan bantuan-bantuan yang telah diberikan.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Berdasarkan rekod eKasih sehingga 31 Oktober 2020, seramai 83,994 Ketua Isi Rumah (KIR) telah berdaftar dengan eKasih di negeri Sabah. Daripada jumlah tersebut, kategori Miskin Tegar adalah sebanyak 15,738 KIR, Miskin sebanyak 23,760 KIR dan Terkeluar sebanyak 44,496 KIR. **Jumlah KIR di Parlimen Lahad Datu ialah sebanyak 2,891, di mana 483 KIR adalah di bawah kategori Miskin Tegar, 611 KIR kategori Miskin dan 1,797 KIR kategori Terkeluar.** Di sini saya ingin mengingatkan bahawa data dalam Sistem eKasih adalah bersifat dinamik dan sentiasa berubah dari semasa ke semasa.

2. Untuk makluman Ahli Yang Berhormat, bilangan bantuan yang telah disalurkan bagi Parlimen Lahad Datu sehingga 31 Oktober 2020 adalah seperti berikut:

Jenis Bantuan	Bil. Bantuan	Nilai Bantuan (RM)
Keperluan Asas	455	13,803,186
Ekonomi	2,673	15,626,753
Sosio Kebajikan	25,359	29,523,078
Pelajaran	9,401	3,216,806
<b>JUMLAH KESELURUHAN</b>	<b>37,888</b>	<b>62,169,823</b>

3. Maklumat bantuan yang disalurkan kementerian/agensi pemberi bantuan adalah seperti berikut:

BIL	KATEGORI BANTUAN	JENIS BANTUAN
1.	Keperluan Asas	Bantuan Bina Rumah Baru, Bantuan Baiki Rumah
2.	Ekonomi	Program Peningkatan Pendapatan, Program AZAM, Bantuan Usahawan
3.	Sosio Kebajikan	Bantuan Orang Tua, Bantuan Kanak-kanak, Elaun Pekerja Cacat, Bantuan Sara Hidup
4.	Pelajaran	Kumpulan Wang Amanah Pelajar Miskin (KWAPM), Bantuan Rancangan Makanan Tambahan (RMT)

Sekian, terima kasih.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : PUAN HANNAH YEOH TSEOW SUAN  
[ SEGAMBUT ]**

**TARIKH : 14 DISEMBER 2020 (ISNIN)**

**SOALAN**

**PUAN HANNAH YEOH TSEOW SUAN [ SEGAMBUT ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah perkembangan terkini Jawatankuasa Pemandu yang telah ditubuhkan untuk memantau pelaksanaan Pelan Strategi Kebangsaan Bagi Menangani Punca Perkahwinan Bawah Umur termasuk jumlah mesyuarat dan sesi konsultasi yang diadakan serta hasil/maklum balas perbincangan. Nyatakan pendirian terkini negeri yang terlibat.

**JAWAPAN**

**Tuan Yang di-Pertua,**

Salah satu kaedah pemantauan pelaksanaan program dan tindakan dalam Pelan Strategik Kebangsaan Bagi Menangani Punca Perkahwinan Bawah Umur (Pelan) adalah melalui penubuhan Jawatankuasa Pemandu Pelan. Jawatankuasa Pemandu ini akan melaksanakan fungsinya sepanjang tempoh Pelan tersebut dilaksanakan iaitu mulai tahun 2020 sehingga 2025. Jawatankuasa ini juga perlu bersidang sebanyak dua (2) kali dalam setahun.

Oleh itu, Mesyuarat Jawatankuasa Pemandu ini telah bersidang pada 24 Ogos 2020 yang lepas, dan menerusi pemantauan oleh Jawatankuasa Pemandu tersebut terhadap pelaksanaan 58 program dan

tindakan yang dirancang, didapati sebanyak 35 program telah bermula, manakala 23 program lagi belum bermula. Antara program dan tindakan yang telah bermula adalah:

- i. pendidikan *Sexual Reproductive Health* (SRH) kepada pelajar melalui program-program di sekolah di bawah anjuran Lembaga Penduduk dan Pembangunan Keluarga Negara (LPPKN); dan
- ii. pendidikan TVET dan program kemahiran kepada kanak-kanak yang tercicir daripada pendidikan di bawah Kementerian Belia dan Sukan (KBS).

Pada masa kini, sebanyak tujuh (7) buah negeri telah bersetuju dengan cadangan untuk menaikkan had umur perkahwinan kepada umur 18 tahun, manakala tujuh (7) buah negeri lain masih belum bersetuju.

Dalam hal ini, seperti yang terkandung dalam Pelan dibawah menangani undang-undang longgar yang memperuntukkan permohonan berkahwin di bawah 18 tahun, KPWKM dengan kerjasama daripada Jabatan Kemajuan Islam Malaysia (JAKIM) akan mengadakan konsultasi penyeragaman umur minimum permohonan kepada 18 tahun dalam Undang-Undang Keluarga Islam bersama tujuh (7) buah negeri tersebut.

Kerajaan melalui agensi pelaksana yang terdiri daripada pelbagai Kementerian, Jabatan Kerajaan, Majlis/ Jabatan Agama Islam Negeri-Negeri dan NGO juga akan terus memastikan pelaksanaan program dan aktiviti yang digariskan dalam Pelan Strategik Kebangsaan Bagi Menangani Punca Perkahwinan Bawah Umur.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN STEVEN CHOONG SHIAU YOON  
[ TEBRAU ]**

**TARIKH : 14 DISEMBER 2020 (ISNIN)**

**SOALAN**

**TUAN STEVEN CHOONG SHIAU YOON [ TEBRAU ]** minta **PERDANA MENTERI** menyatakan apakah usaha Kerajaan bagi memantapkan lagi Akta Perlindungan Pemberi Maklumat 2010 kerana terdapat beberapa isu tertentu yang perlu diberikan perhatian secara khusus seperti keselamatan dan immuniti pemberi maklumat.

**JAWAPAN**

**YB DATO' TAKIYUDDIN BIN HASSAN, MENTERI DI JABATAN  
PERDANA MENTERI (PARLIMEN DAN UNDANG-UNDANG)**

**Tuan Yang di-Pertua,**

Untuk makluman Ahli Yang Berhormat, Kerajaan melalui Bahagian Hal Ehwal Undang-Undang, Jabatan Perdana Menteri (BHEUU, JPM) telah menubuhkan satu Jawatankuasa Kerja bagi menyemak Akta Perlindungan Pemberi Maklumat 2010 [Akta 711]. Pada masa ini, kajian semakan pindaan Akta 711 berada dalam fasa pengumpulan input daripada pelbagai pihak berkepentingan iaitu agensi penguatkuasaan seperti Polis diRaja Malaysia (PDRM), Suruhanjaya Pencegahan Rasuah Malaysia (SPRM), Kastam diRaja Malaysia (KDRM), Jabatan Imigresen Malaysia (JIM), Jabatan Pengangkutan Jalan Malaysia (JPJ), Suruhanjaya Syarikat Malaysia (SSM) dan Suruhanjaya Sekuriti Malaysia (SECCOM).

Kajian semakan ini melihat semua isu secara menyeluruh termasuk aspek keselamatan dan kekebalan (*immunity*) kepada pemberi maklumat. Jawatankuasa dijangka akan melengkapkan kajian mereka pada suku pertama tahun 2021 sebelum syor dikemukakan untuk pertimbangan dan kelulusan Kerajaan. Selain daripada cadangan pindaan Akta 711 ini, BHEUU, JPM juga turut akan mengadakan sesi libat urus dengan Pihak Berkuasa Tempatan (PBT) bagi memperkenalkan dan memperluaskan penggunaan Akta ini di kalangan agensi penguatkuasa di PBT.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK MOHD. AZIS BIN JAMMAN  
[SEPANGGAR]**

**TARIKH : 14 DISEMBER 2020 (ISNIN)**

**SOALAN**

Minta **PERDANA MENTERI** menyatakan dasar yang lebih jelas berkenaan hala tuju pembangunan keseluruhan di Sabah dan Sarawak yang sekian lama terpinggir dari arus pembangunan berbanding Semenanjung Malaysia.

**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

**Tuan Yang di-Pertua,**

1. Seperti mana Ahli Yang Berhormat semua maklum, Kerajaan sentiasa beriltizam untuk menjadikan Malaysia sebagai sebuah negara yang terus membangun secara mampan seiring dengan pengagihan ekonomi yang adil, saksama dan inklusif pada semua peringkat kumpulan pendapatan, etnik, wilayah dan rangkaian bekalan.

2. Untuk makluman Ahli Yang Berhormat, tumpuan Kerajaan adalah ke arah memastikan pembangunan yang seimbang dilaksanakan merentasi Sabah dan Sarawak. Dalam melaksanakan strategi inklusif wilayah serta pembangunan seimbang dan saksama tersebut, aktiviti Pertumbuhan Ekonomi Utama (*Key Economic Growth Activities – KEGA*) telah dikenal pasti di Sabah dan Sarawak bagi memberi fokus kepada aktiviti ekonomi berdasarkan kekuatan dan keunikan kedua-dua negeri tersebut. Antara

contoh fokus aktiviti ekonomi berdasarkan negeri yang dikenal pasti dalam WKB adalah ekopelancongan di Sabah dan tenaga boleh diperbaharui di Sarawak.

3. Dalam tempoh Rancangan Malaysia Kesebelas (RMKe-11), peruntukan pembangunan Kerajaan Persekutuan telah diagih dengan keutamaan diberi kepada enam negeri yang kurang membangun termasuk Sabah dan Sarawak. Sabah dan Sarawak telah pun diperuntukkan sejumlah RM40.62 bilion dalam tempoh RMKe-11 bagi melaksanakan projek baharu dan projek sambungan melalui pelbagai kementerian.

4. Di samping itu, RMKe-12 yang berteraskan kepada WKB 2030 juga memberi fokus kepada tiga objektifnya iaitu:

- Pembangunan untuk semua;
- Menangani Jurang Kekayaan dan Pendapatan; dan
- Mewujudkan Negara yang Bersatu, Makmur dan Bermaruah.

5. Bagi mencerminkan komitmen dan keseriusan Kerajaan berhubung usaha-usaha untuk mengembalikan hak negeri Sabah dan Sarawak seperti mana yang termaktub dalam Perlembagaan Persekutuan (PP) dan Perjanjian Malaysia 1963 (MA63), Majlis Khas Mengenai Perjanjian Malaysia 1963 (MKMA63) telah ditubuhkan dengan dipengerusikan oleh YAB Perdana Menteri. Bahagian Hal Ehwal Sabah dan Sarawak, Jabatan Perdana Menteri (BHESS, JPM) akan memberi tumpuan utama ke atas mencapai penyelesaian berhubung hal-hal perundangan, khasnya MA63, keselamatan/pendatang asing, petroleum/gas, pembangunan ekonomi seimbang dan keperluan infrastruktur asas di Sabah dan Sarawak.

6. Secara amnya, usaha gigih yang dilaksanakan oleh Kerajaan dalam memastikan pembangunan wilayah lebih seimbang merentasi Sabah dan Sarawak diharap akan menyumbang ke arah mencapai pertumbuhan yang inklusif serta memastikan kesejahteraan seluruh rakyat.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB TUAN OSCAR LING CHAI YEW**  
**KAWASAN : SIBU**  
**TARIKH : 14 DISEMBER 2020 (ISNIN)**

**SOALAN NO. 34**

minta **MENTERI KANAN KERJA RAYA** menyatakan bagaimana Kementerian mengatasi masalah keadaan jalan Pan Borneo yang tidak memuaskan dan membahayakan nyawa pengguna jalan tersebut sementara projek ini masih dalam proses pembinaan, terutamanya di antara Selangau dan Bintulu.

**JAWAPAN**

Tuan Yang Di-Pertua,

Untuk makluman Ahli Yang Berhormat jua, prosedur-prosedur keselamatan seperti berikut diguna pakai bagi memastikan keselamatan pengguna jalan raya semasa pelaksanaan Projek Lebuhraya Pan Borneo Sarawak:

- 1) Prosedur Pelan Pengurusan Trafik (*Traffic Management Plan* – TMP) di tapak bina sepanjang pembinaan jalan raya, berpandukan kepada Piawaian Arahan Teknik JKR;
- 2) Akta Kilang Dan Jentera 1967, Peraturan (*Building Operation and Works of Engineering Construction* - BOWEC) 1986;
- 3) Akta Keselamatan dan Kesihatan Pekerjaan 1994; dan
- 4) Garis Panduan Keselamatan dan Kesihatan Pekerjaan Awam di Tapak Bina Tahun 2007.

Sekiranya terdapat kegagalan pihak kontraktor untuk mematuhi prosedur-prosedur keselamatan yang telah dinyatakan, Arahan Pemberhentian Kerja (*Stop Work Order*) akan dikeluarkan kepada kontraktor. Kerja-kerja pembinaan hanya boleh diteruskan setelah penambahbaikan dilaksanakan oleh kontraktor berdasarkan Notis Penambahbaikan (*Corrective Action Request* - CAR) oleh Pegawai Penguasa.

Selain daripada prosedur-prosedur keselamatan tersebut, pemantauan berterusan turut dilakukan oleh Kementerian dan JKR Sarawak selaku Pegawai Penguasa khususnya bagi jajaran Selangau ke Bintulu bagi memastikan keselamatan dan keselesaan pengguna jalan raya khususnya di sepanjang kawasan pembinaan Projek Lebuhraya Pan Borneo Sarawak. Ini termasuklah pemeriksaan mengejut dan audit

**NO SOALAN : 34**

keselamatan jalanraya oleh pihak ketiga, iaitu Ibu Pejabat JKR Malaysia yang diadakan mengikut keperluan dan aduan sekiranya ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB DATUK IGNATIUS DORELL LEIKING**  
**KAWASAN : PENAMPANG**  
**TARIKH : 14 DISEMBER 2020 (ISNIN)**

**SOALAN NO. 35**

minta **MENTERI KANAN KERJA RAYA** menyatakan status naik taraf jalan dari Donggongan ke simpang jalan Papar, Sabah (Pakej 1) yang berjumlah RM232.9 juta seperti dalam senarai projek RP4 RMK-11 P.174 Penampang yang diumumkan oleh Jabatan Perdana Menteri pada 18 Februari 2019.

**JAWAPAN**

Tuan Yang Di-Pertua,

Untuk makluman Ahli Yang Berhormat, Projek Naik Taraf Jalan Dari Donggongan ke Simpang Jalan Papar Spur, Sabah (Pakej 1) telah diluluskan pada tahun 2013 di bawah Rolling Plan 3 Rancangan Malaysia ke Sepuluh (RP 3, RMKe-10) dan bukanlah diluluskan di bawah Rolling Plan 4 Rancangan Malaysia ke-11 (RP 4, RMKe-11). Projek dengan kos sebanyak RM232.9juta ini telah siap sepenuhnya pada 30 Jun 2017 dengan skop projek merangkumi naik taraf jalan dari jalan dua lorong dua hala kepada empat lorong dua hala. Ianya telah memberi manfaat dan keselesaan kepada pengguna jalanraya tersebut yang sebelum ini mengalami kesesakan teruk.

Manakala pada Rolling Plan Pertama, Rancangan Malaysia ke-11 (RP1, RMKe11), projek Menaiktaraf Jalan Dari Donggongan ke Simpang Jalan Papar Spur ini telah disambung dan diluluskan melalui Pakej 2 & 3 dengan kos sebanyak RM380 juta. Projek ini meliputi kerja-kerja menaiktaraf jalan sedia ada tunggal 2 lorong 2 hala kepada jalan berkembar 4 lorong 2 hala sepanjang 16km bermula dari Kampung Langkuas ke Jambatan Simpudu. Projek Menaiktaraf Jalan Dari Donggongan ke Simpang Jalan Papar Spur (Pakej 2 & 3) ini masih dalam pelaksanaan dengan status pelaksanaan di tapak sebanyak 92%.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' HAJI MAHFUZ BIN HAJI OMAR  
[ POKOK SENA ]**

**TARIKH : 14 DISEMBER 2020 (ISNIN)**

**SOALAN**

**YB DATO' HAJI MAHFUZ BIN HAJI OMAR [ POKOK SENA ]**  
menyatakan:-

- (a) senarai hotel-hotel mengikut negeri yang telah ditutup akibat pandemik COVID-19 serta jumlah pekerja hotel yang kehilangan pekerjaan; dan
- (b) apakah langkah-langkah Kementerian bagi membantu pengusaha-pengusaha hotel tersebut.

**JAWAPAN**

**Tuan Yang di-Pertua,**

1. Penularan wabak COVID-19 telah memberi impak negatif yang sangat besar kepada industri pelancongan di seluruh dunia. Bagi Malaysia, Kempen Tahun Melawat Malaysia 2020 yang telah dirancang terpaksa dibatalkan berikutan pengisytiharan dan pelaksanaan Perintah Kawalan Pergerakan (PKP) pada 18 Mac 2020 yang lalu.

2. Susulan pandemik ini, Kementerian Pelancongan, Seni dan Budaya (MOTAC) menganggarkan kerugian melebihi RM100 bilion bagi industri pelancongan pada tahun 2020 akibat kehilangan perbelanjaan pelancong terutamanya yang berkaitan dengan penginapan, pengangkutan, membeli-belah, makanan dan minuman. Pelaksanaan perintah kawalan di beberapa lokasi berikutan gelombang ketiga penularan COVID-19 yang melanda negara ketika ini juga akan memberi kesan yang lebih buruk.

3. Untuk makluman Ahli Yang Berhormat, berdasarkan maklumat yang diperolehi daripada Suruhanjaya Syarikat Malaysia (SSM), statistik entiti perniagaan bagi pelancongan dan perhotelan yang telah menamatkan perniagaan dalam tempoh bulan Mac hingga Oktober 2020 adalah seperti di bawah. Data ini tidak memaklumkan alasan penamatan perniagaan dan juga maklumat lain seperti tarikh mula kes penggulangan difailkan di mahkamah.

- (i) Sebanyak 77 buah syarikat dengan kod 55101 hingga 55109 iaitu *hotels and resort hotels, motels, apartment hotels, chalets, rest house/guest house, bed and breakfast units, hostels, home stay and other short term accomodation activities* telah menamatkan perniagaan;
- (ii) Manakala penggulangan oleh mahkamah dan penggulangan secara sukarela untuk syarikat dengan kod yang sama adalah sebanyak 32 buah syarikat;

4. Sehubungan itu, dalam usaha untuk membantu industri pelancongan negara untuk bankit semula, MOTAC telah merangka dan melaksanakan Pelan Pemulihan Pelancongan dan Kebudayaan, antaranya melalui strategi-strategi berikut:

- (i) memulihkan kembali keyakinan orang awam untuk kembali melancong di mana komuniti pelancongan perlu mengamalkan pembudayaan baru dengan pematuhan kepada prosedur operasi standard atau SOP-SOP yang telah ditetapkan sebagai norma baharu aktiviti pelancongan di Malaysia;
- (ii) merencanakan semula pelancongan domestik dengan menawarkan pakej-pakej pelancongan yang lebih kreatif dan menarik melalui platform digital serta memperkenalkan dan mempromosikan keunikan destinasi pelancongan di luar bandar atau *hidden gems* kerana pelancong kini lebih cenderung memilih destinasi yang selamat, kurang orang dan udara segar;
- (iii) meningkatkan standard dan kualiti perkhidmatan dan produk-produk pelancongan dan kebudayaan terutamanya dari segi kebersihan dan keselamatan selaras dengan SOP pengoperasian yang telah ditetapkan oleh Majlis Keselamatan Negara (MKN) di tempat-tempat tarikan pelancong utama;
- (iv) meningkatkan penggunaan teknologi untuk perjalanan yang selamat, lancar dan tanpa sentuhan seperti pembayaran tanpa tunai (*cashless payment*), tempahan dalam talian (*online booking*), transaksi tanpa sentuhan (*contactless transaction*) dan daftar masuk tanpa sentuhan;
- (v) memperkukuhkan kerjasama awam-swasta (*public-private partnerships*) terutamanya dalam mencipta semula produk pelancongan, seni dan budaya untuk menjadi lebih menarik dan inovatif; dan



- (vi) *reskilling* dan *upskilling* bagi meningkatkan kualiti dan kredibiliti profesion dengan adaptasi kepada budaya dan norma baharu.

5. Di samping itu, sebagai kesinambungan kepada kebenaran rentas negeri dan daerah baru-baru ini, MOTAC akan terus berusaha untuk menyemarakkan pelancongan domestik negara. Antaranya termasuklah memperuntukkan sebahagian besar peruntukan di bawah Belanjawan 2021 bagi Pelan Pemulihan Pelancongan dan Kebudayaan yang merangkumi pelbagai inisiatif menarik kepada rakyat, seperti baucar penginapan, diskaun destinasi pelancongan, diskaun percutian keluarga, penyemarakkan seni budaya, kempen '*Meet in Malaysia*', diskaun pakej petugas barisan hadapan, potongan diskaun beli-belah serta diskaun pengangkutan. Inisiatif ini diyakini dapat merangsang dan menyuntik perbelanjaan domestik secara konsisten dan seterusnya mewujudkan kesan gandaan ekonomi khususnya yang berantaian dengan sektor pelancongan, seni dan budaya.

6. Menerusi PENJANA, Kerajaan juga telah mengumumkan pelanjutan pelepasan cukai pendapatan individu sehingga RM1,000 ke atas perbelanjaan melancong dalam negara sehingga 31 Disember 2021 bagi merancakkan pelancongan domestik negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KHALID BIN ABD SAMAD [SHAH ALAM]**

**TARIKH : 14 DISEMBER 2020 (ISNIN)**

**SOALAN**

Minta **PERDANA MENTERI** menyatakan apakah peranan utama Duta Khas Perdana Menteri di Timur Tengah berbanding Duta-Duta Negara di Timur Tengah yang sedia ada dan apakah laporan terkini gerak kerja Duta Khas Perdana Menteri di Timur Tengah sepanjang 7 bulan dilantik ke jawatan tersebut.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, tugas Duta Khas YAB Perdana Menteri ke Timur Tengah adalah untuk membantu dan menasihati YAB Perdana Menteri dalam isu-isu Timur Tengah dan perkara-perkara yang berhubung kait dengan kepentingan Malaysia di rantau tersebut. Ia meliputi dalam bidang agama Islam, Pendidikan, Perdagangan dan Pelaburan.
2. Sejak dilantik, YB Duta Khas telah melakukan gerak kerja meneroka peluang-peluang untuk Malaysia memanfaatkan hubungan diplomatik yang baik dengan negara-negara Timur Tengah. YB Duta Khas telah mengadakan perbincangan dengan YB Menteri Luar dan agensi-agensi berkaitan. Selain itu, YB Duta Khas juga telah mengadakan perjumpaan dan menerima kunjungan hormat Duta-Duta negara Timur Tengah seperti Arab Saudi, Yaman, Qatar, Iran, Oman, Afghanistan, Syria dan Bahrain dan mendapat maklum balas langsung dalam usaha mengeratkan hubungan dua hala melibatkan kerjasama agama Islam, politik, ekonomi, pelaburan dan pendidikan.
3. Hasil kerja dan laporan oleh Duta Khas dilaporkan terus kepada YAB Perdana Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN ANYI NGAU [ BARAM ]**

**TARIKH : 14 DISEMBER 2020 (ISNIN)**

**SOALAN**

Minta **MENTERI PENDIDIKAN** menyatakan jumlah peruntukan serta bilangan sekolah daif yang dibaik pulih sejak tahun 2018 di Sarawak dan kawasan Parlimen Baram.

**JAWAPAN**

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memastikan infrastruktur fizikal sekolah berada dalam keadaan baik bagi menjamin keselamatan dan keselesaan warga sekolah.

Untuk makluman Ahli Yang Berhormat, dalam tempoh Rancangan Malaysia Ke-11 (RMKe-11), iaitu bagi tahun 2016 hingga tahun 2020, sejumlah RM3.055 bilion telah diluluskan untuk projek naik taraf dan pembangunan semula bangunan daif bagi 773 buah sekolah di seluruh negara. Daripada keseluruhan peruntukan tersebut, sejumlah RM1.388 bilion adalah untuk menaik taraf dan membangun semula 291 buah sekolah yang mempunyai bangunan daif di Sarawak.

Bagi tempoh mulai tahun 2018 sehingga tahun 2020, sebanyak 241 buah sekolah yang mempunyai bangunan daif di negeri Sarawak telah dinaiktaraf dan dibangunkan semula dengan kos projek berjumlah RM1.216 bilion.

Khusus di Parlimen Baram, sebanyak 15 projek menaik taraf dan membangunkan semula bangunan daif di sekolah telah diluluskan bagi tahun 2018 hingga 2020 dengan kos projek berjumlah RM167.48 juta. Pelaksanaan projek berkenaan meliputi skop pembinaan bilik darjah, bilik sains, dewan makan, tandas dan kemudahankemudahan lain.

Sehingga 30 November 2020, prestasi pelaksanaan projek naik taraf dan pembangunan semula bangunan daif di Parlimen Baram adalah sebanyak lapan buah sekolah telah siap, dua buah sekolah masih dalam pembinaan, satu sekolah dalam proses perolehan dan baki empat buah sekolah berada dalam fasa pra bina. Kesemua projek ini dilaksanakan oleh Jabatan Kerja Raya Negeri Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**  
**DARIPADA : YB TUAN ROBERT LAWSON CHUAT**  
**KAWASAN : BETONG**  
**TARIKH : 14 DISEMBER 2020 (ISNIN)**

**SOALAN NO. 39**

minta **MENTERI KANAN KERJA RAYA** menyatakan langkah-langkah bagi memastikan keadaan jalan raya di Malaysia ini sentiasa selamat untuk digunakan, bagi mengelakkan kemalangan jalan raya yang berpunca daripada struktur jalan raya yang rosak .

**JAWAPAN**

Tuan Yang Di-Pertua,

Untuk makluman Ahli Yang Berhormat, Kementerian amat mengambil berat akan isu keselamatan jalan raya khususnya di Jalan Persekutuan seluruh negara. Bagi maksud tersebut dan sebagai langkah jangka pendek, Kementerian ini melalui Program Menaiktaraf Infrastruktur Keselamatan Jalan Raya di bawah skop kerja merawat dan memperelok lokasi kerap berlaku kemalangan, pihak Kementerian dan JKR akan mengenal pasti dan memperbaiki lokasi kerap berlaku kemalangan di jalan raya Persekutuan tersebut yang dikenali sebagai kawasan *blackspots* untuk mengurangkan kemalangan yang disebabkan oleh faktor kejuruteraan jalan.

Bagi rekod pembaikan *blackspots* yang telah dilaksanakan di jalan – jalan Persekutuan seluruh negara dalam Rancangan Malaysia ke-11, sebanyak **113** lokasi telah dilaksanakan pembaikan pada tahun 2017 hingga 2019. Manakala pada tahun 2020 pula, sebanyak 50 lokasi disasarkan untuk dibaikpulih yang menjadikan keseluruhan lokasi sebanyak **163 lokasi**. Pembaikan ini bersifat *low cost solution but high impact* (dengan izin).

Pemantauan akan terus dilaksanakan pada setiap masa oleh pihak Kementerian dan Jabatan Kerja Raya di kawasan *blackspots* yang telah dibuat rawatan disamping mengenalpasti lokasi - lokasi baru *blackspots* di seluruh negara.

Untuk makluman Ahli-Ahli Yang Berhormat, kerja-kerja penyenggaraan Jalan Persekutuan di seluruh Malaysia dilaksanakan oleh pihak konsesi yang telah dilantik oleh Kementerian Kerja Raya. Pelaksanaan kerja-kerja penyenggaraan ini adalah di bawah pengawasan sepenuhnya oleh pihak JKR Malaysia, JKR Sabah dan JKR Sarawak iaitu pihak yang telah dilantik sebagai wakil kerajaan.

Skop utama kerja – kerja penyenggaraan jalan yang dilaksanakan adalah terdiri daripada penyenggaraan rutin (sepanjang tahun), berkala pavemen, berkala bukan pavemen, penyenggaraan jambatan, penyenggaraan lampu jalan dan lampu isyarat serta kerja-kerja kecemasan. Kementerian ini telah memperuntukkan sebanyak RM400 juta setiap tahun bagi pelaksanaan kerja-kerja penyenggaraan rutin. Manakala peruntukan bagi penyenggaraan berkala pavemen dan berkala bukan pavemen pula, sebanyak RM 674 juta telah diperuntukkan sepanjang tahun 2020.

Untuk makluman Ahli-Ahli Yang Berhormat, Kementerian Kerja Raya sentiasa berusaha dari semasa ke semasa untuk memastikan jalan persekutuan di negara ini berada dalam keadaan selamat dan selesa. Justeru, Kementerian sentiasa memperkasakan dasar-dasar sediaada dan mewujudkan dasar-dasar baharu serta program-program penyenggaraan Jalan Persekutuan di bawah program penyenggaraan berkala sama ada penyenggaraan berkala pavemen mahupun penyenggaraan berkala bukan pavemen. Namun begitu, pelaksanaan program penyenggaraan berkala ini adalah tertakluk kepada senarai keutamaan negeri dan juga kelulusan peruntukan oleh Kementerian Kewangan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJI HASANUDDIN BIN MOHD  
YUNUS [ HULU LANGAT ]**

**TARIKH : 14 DISEMBER 2020 (ISNIN)**

**SOALAN**

**DATUK HAJI HASANUDDIN BIN MOHD YUNUS [ HULU LANGAT ]** minta **PERDANA MENTERI** menyatakan apakah rancangan jangka panjang Kerajaan untuk mengatasi masalah kekurangan Sekolah Rendah Agama (SRA) di W.P. Kuala Lumpur kerana ada murid yang terpaksa ditolak pendaftarannya untuk kemasukan ke darjah satu.

**JAWAPAN: (YB. SENATOR DATUK DR. HAJI ZULKIFLI BIN MOHAMAD AL-BAKRI, MENTERI DI JABATAN PERDANA MENTERI)**

**Tuan Yang Dipertua,**

**Untuk makluman Ahli Yang Berhormat,**

(i) Jabatan Agama Islam Wilayah Persekutuan (JAWI) sebagai pihak yang bertanggungjawab mentadbir dan mengurus hal ehwal pendidikan Islam di Wilayah-Wilayah Persekutuan Kuala Lumpur, Putrajaya dan Labuan akan mengadakan kerjasama dengan agensi-agensi berkaitan di Wilayah Persekutuan untuk membantu dari segi penyediaan premis dan sebagainya bagi memastikan anak-anak Islam tidak terabai daripada mendapatkan pendidikan Islam asas.

(ii) Selain itu, JAWI turut mengemukakan permohonan dalam Rancangan Malaysia Ke-12 (RMK-12) bagi pembinaan baru Sekolah Rendah Agama (SRA) untuk menampung kekurangan sedia ada.

Sekian, terima kasih.

PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS

PERTANYAAN : LISAN

DARIPADA : DR. LEE BOON CHYE [ GOPENG ]

TARIKH : 14 DISEMBER 2020 (ISNIN)

**SOALAN**

DR. LEE BOON CHYE [ GOPENG ] minta MENTERI KESIHATAN menyatakan bilangan graduan perubatan yang mempunyai Sijil Perakuan Pengamalan Sementara yang masih menunggu penempatan sebagai pegawai perubatan siswazah.

**JAWAPAN**

Tuan Yang di-Pertua,

1. Sebelum graduan perubatan layak dilantik sebagai Pegawai Perubatan Gred UD41 untuk menjalani latihan siswazah, **mereka perlu mendapatkan Surat Layak Daftar daripada Majlis Perubatan Malaysia (MPM) bagi kegunaan permohonan pekerjaan dengan Suruhanjaya Perkhidmatan Awam (SPA)**. Selepas mereka lulus tapisan SPA dan ditawarkan pelantikan, barulah MPM akan mengeluarkan Sijil Pendaftaran Sementara.
2. Bagi tahun 2020, **seramai 4,505 graduan perubatan telah dilantik sebagai Pegawai Perubatan Gred UD41 menerusi lima (5) kohort pengambilan**. Kementerian Kesihatan juga sedang menyelaras pengambilan untuk kohort yang keenam pada November 2020 dan dijangka seramai 759 graduan lagi akan ditawarkan pelantikan.
3. Oleh itu, pada masa ini **tiada graduan perubatan yang telah memiliki Sijil Pendaftaran Sementara masih menunggu penempatan sebagai Pegawai Perubatan Gred UD41** kerana sijil ini dikeluarkan selepas mereka ditawarkan pelantikan. Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI DR. HAJI DZULKEFLY BIN  
AHMAD [ KUALA SELANGOR ]**

**TARIKH : 14 DISEMBER 2020 (ISNIN)**

**SOALAN**

**DATUK SERI DR. HAJI DZULKEFLY BIN AHMAD [ KUALA SELANGOR ]** minta **MENTERI KESIHATAN** menyatakan bilakah Kerajaan bercadang untuk mengimplementasi Program Perubatan Siswazah Cemerlang yang memberi peluang kepada pelatih perubatan siswazah "*Houseman*" untuk tamatkan '*Housemanship*' dalam tempoh 18 bulan berbanding 2 tahun melalui program '*Fast Track*' yang telah dipersetujui oleh Kabinet pada tahun 2018.

**JAWAPAN**

**Tuan Yang di-Pertua,**

1. Kerajaan sentiasa proaktif melaksanakan penambahbaikan dalam Program Pegawai Perubatan Siswazah (PPS) terutamanya kepada PPS yang mempunyai bakat terbaik dan cemerlang melalui *High Performance Housemanship Programme* (HPHP).
2. Cadangan HPHP tersebut dikemukakan pada masa lalu iaitu **semasa PPS merupakan lantikan tetap** supaya mereka dapat menamatkan posting wajib dengan lebih awal bagi mengikuti program kepakaran dan diberi Hadiah Latihan Persekutuan (HLP). Hal ini seterusnya membolehkan lebih ramai pakar dihasilkan dengan lebih cepat untuk keperluan negara.
3. Namun begitu, sejak 2016 **apabila PPS dilantik secara kontrak** dan tidak lagi berpeluang untuk mengikuti program kepakaran atau mendapat HLP, maka pelaksanaan HPHP tersebut **sedang disemak semula**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NOOR AMIN BIN AHMAD [ KANGAR ]**

**TARIKH : 14 DISEMBER 2020 (ISNIN)**

**SOALAN**

Minta **PERDANA MENTERI** menyatakan berapa banyakkah dana pembiayaan Bumiputera telah dimohon sejak ia diperkenalkan sehingga kini. Minta pecahan anggaran jumlah mereka yang layak mengikut industri dan jumlah pemohon mengikut negeri sejak ia dibuka sehingga kini.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

**Tuan Yang di-Pertua,**

1. Unit Peneraju Agenda Bumiputera (TERAJU), Jabatan Perdana Menteri, telah melaksanakan pelbagai program pembangunan serta pembiayaan bagi usahawan Bumiputera sejak penubuhan TERAJU dari tahun 2011 sehingga kini. Antara program pembiayaan yang dijalankan oleh TERAJU adalah seperti program Dana Mudah Cara, Skim Usahawan Permulaan Bumiputera ("SUPERB"), Dana Pembangunan Usahawan Bumiputera ("DPUB") dan program Dana TERAS.

2. Sehingga kini, sebanyak RM2.243bilion dana pembiayaan telah diluluskan dan disalurkan kepada 16,238 usahawan Bumiputera melalui program-program tersebut. Pecahan dana pembiayaan mengikut program adalah seperti berikut:

No.	Program	Jumlah Penerima/Kelulusan	Jumlah Dana (RM juta)
1.	Dana Mudah Cara	348 penerima	374.51
2.	Skim Usahawan Permulaan Bumiputera ("SUPERB")	183 penerima	91.5
3.	Dana Pembangunan Usahawan Bumiputera ("DPUB")	15,210 penerima	75.23
4.	Program Dana TERAS	497 diluluskan	1,702.51
<b>JUMLAH</b>		<b>15,741 penerima 497 diluluskan</b>	<b>2,243.75</b>

3. Untuk makluman Ahli Yang Berhormat, perincian bagi dana pembiayaan tersebut adalah seperti berikut:

**i. Program Dana Mudah Cara**

Dana Mudahcara diwujudkan sebagai *tipping point* kepada inisiatif pelaburan swasta. Geran sehingga 10% daripada keseluruhan kos projek yang layak bagi komponen infrastruktur, mesin dan kelengkapan bertindak sebagai pemangkin untuk pelaburan syarikat Bumiputera terutamanya yang melibatkan lima (5) sektor keutamaan iaitu:

- (a)pembinaan & pembangunan hartanah;
- (b)pelancongan;
- (c)pengilangan;
- (d)pertanian; dan
- (e)komunikasi, kreativiti, kandungan dan infrastruktur.

Sehingga tahun 2020, sebanyak RM374.51 juta Dana Mudah Cara telah disalurkan kepada 348 penerima yang terdiri daripada syarikat Bumiputera.

Tahun	Jumlah Penerima	Jumlah Dana (RM juta)
2016	81	114.76
2017	119	142.53
2018	93	87.86
2019	48	24.92
2020	7	4.45
<b>Jumlah</b>	<b>348</b>	<b>374.51</b>

*\*Bermula dari tahun 2020, Dana Mudah Cara telah ditukar kepada Dana Kemakmuran Bumiputera ("DKB")*

## ii. Skim Usahawan Permulaan Bumiputera (SUPERB)

SUPERB menyediakan geran sehingga RM500,000 untuk menyokong idea perniagaan yang inovatif dan kreatif. Ia merupakan pembiayaan untuk membantu syarikat-syarikat *start-up*. Program ini dibuka kepada Bumiputera yang ingin menjadi usahawan atau syarikat Bumiputera yang beroperasi kurang daripada 3 tahun. Sehingga tahun 2020, sebanyak RM91.5 juta dana SUPERB telah diluluskan dan disalurkan kepada 183 usahawan Bumiputera.

Negeri	Jumlah Penerima	Jumlah Dana (RM juta)
Kuala Lumpur	35	17.50
Selangor	68	34.00
Melaka	1	0.50
Negeri Sembilan	7	3.50
Pulau Pinang	5	2.50
Kedah	6	3.00
Perlis	1	0.50
Perak	10	5.00
Kelantan	6	3.00
Terengganu	9	4.50
Pahang	2	1.00



Johor	17	8.50
Sarawak	9	4.50
Sabah	7	3.50
<b>Jumlah</b>	<b>183</b>	<b>91.50</b>

### **iii. Program Dana Pembangunan Usahawan Bumiputera (DPUB)**

Program DPUB memberi penekanan dan fokus untuk membangunkan kapasiti dan kemampuan komuniti B40 yang berada di luar bandar bagi melahirkan usahawan dan produk-produk Bumiputera. Program ini memberi tumpuan kepada penerapan elemen keusahawanan dalam komuniti dengan berasaskan inovasi, teknologi dan pembaharuan yang mana melibatkan Pemindahan Ilmu & Teknologi, Infrastruktur Asas & Modal Insan, Marketing Mix – 5P dan Rantaian Pemasaran. Sehingga tahun 2020, sebanyak RM75.23 juta dana DPUB telah disalurkan kepada 15,210 penerima yang terdiri daripada usahawan Bumiputera.

<b>Negeri</b>	<b>Jumlah Penerima</b>	<b>Jumlah Dana (RM juta)</b>
ECER	2,110	9.00
NCIA	731	12.04
IRDA	1,123	7.71
Sabah	10,373	31.48
Sarawak	873	15.00
<b>Jumlah</b>	<b>15,210</b>	<b>75.23</b>

### **iv. Program Dana TERAS**

Program Dana TERAS bertujuan memudahkan pengembangan perniagaan syarikat Bumiputera di bawah Program Syarikat Bumiputera Berprestasi Tinggi (TERAS). Pembiayaan di bawah Dana TERAS adalah untuk modal kerja dan pembelian aset. Dana ini disediakan secara kolaborasi antara TERAJU dan institusi kewangan.

**NO. SOALAN : 43**

Dana TERAS hanya terbuka kepada syarikat yang berada di bawah program syarikat TERAS. Sehingga tahun 2020, sebanyak 497 permohonan telah diluluskan dengan jumlah dana diperuntukkan adalah sebanyak RM1,702.51 juta.

Pecahan mengikut tahun adalah seperti berikut:

<b>Tahun</b>	<b>Jumlah Kelulusan</b>	<b>Jumlah Dana Diperuntukkan (RM juta)</b>
2012	26	180.42
2013	105	238.11
2014	120	365.59
2015	106	238.00
2016	49	196.93
2017	43	180.19
2018	39	265.15
2019	7	34.60
2020	2	3.50
<b>Jumlah</b>	<b>497</b>	<b>1,702.51</b>

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK DR. HASAN BIN BAHROM [TAMPIN]**

**TARIKH : 14 DISEMBER 2020 (ISNIN)**

**SOALAN**

**DATUK DR. HASAN BIN BAHROM [ TAMPIN ]** minta **MENTERI DALAM NEGERI** menyatakan berapa jumlah mereka yang terlibat kes rasuah bagi tahun 2020, dan apakah Tindakan yang lebih mendasar dan konkrit yang dilakukan oleh Kerajaan dalam membasmi rasuah

**JAWAPAN**

**YB DATO' TAKIYUDDIN BIN HASSAN, MENTERI DI JABATAN PERDANA MENTERI (PARLIMEN DAN UNDANG-UNDANG)**

**Tuan Yang di-Pertua,**

Untuk makluman Ahli Yang Berhormat, sepanjang tahun 2020 iaitu sehingga September, SPRM telah membuka 706 Kertas Siasatan yang mana melibatkan tangkapan sebanyak 749.

Sesungguhnya, keseriusan Kerajaan dalam membanteras rasuah telah diterjemahkan melalui pelaksanaan Pelan Antirasuah Nasional (NACP) 2019-2023. Ini bertujuan meningkatkan kecekapan dan ketelusan pengurusan Kerajaan berteraskan prinsip governans, integriti dan antirasuah. Sehingga 31 Mei 2020, sebanyak 29 inisiatif di bawah 6 strategi pelaksanaan NACP berkenaan telah selesai dilaksanakan iaitu:-

- |     |                         |   |    |           |
|-----|-------------------------|---|----|-----------|
| i)  | Tadbir Urus Politik     | : | 13 | Inisiatif |
| ii) | Pentadbiran Sektor Awam | : | 3  | Inisiatif |

iii)	Perolehan Awam	:	4	Inisiatif
iv)	Perundangan/Kehakiman	:	1	Inisiatif
v)	Penguatkuasaan Undang-Undang	:	5	Inisiatif
vi)	Tadbir Urus Korporat	:	3	Inisiatif

SPRM sebagai sebuah agensi pencegahan rasuah di negara ini mendukung NACP dan dipertanggungjawabkan sebagai peneraju bagi 11 inisiatif NACP serta memberi sokongan (*supporting role*) kepada 22 inisiatif yang lain. Sehingga ke hari ini, masyarakat dapat menyaksikan SPRM begitu agresif mengekang rasuah di negara ini. Tindakan ini merangkumi tangkapan dan pendakwaan yang membawa tertuduh ke muka pengadilan. Beberapa kes salahguna kuasa yang menyebabkan ketirisan dalam pengurusan dana rakyat telah disiasat dan dituduh. Tindakan agresif SPRM ini dalam membendung rasuah sedikit sebanyak membantu Malaysia dalam memperbaiki reputasi dalam Indeks Persepsi Rasuah (CPI) 2019. Malaysia melonjak ke tangga 51 berbanding di kedudukan ke-61 pada 2018, selain mencatatkan peningkatan skor kepada 53 mata.

Semua pendekatan dan usaha ke arah membanteras amalan rasuah dan salah guna kuasa akan diberikan penekanan oleh Kerajaan melalui dasar-dasar yang telah dipersetujui seperti yang dinyatakan dalam inisiatif NACP. Ini termasuk inisiatif yang terbentuk berasaskan laporan Pertubuhan Bangsa-Bangsa Bersatu (PBB) melalui pernyataan *United Nations Convention against Corruption* (UNCAC). NACP dibuat dengan mengambil kira piawaian laporan antarabangsa PBB melalui UNCAC. Namun, perkara-perkara yang telah dirangka tidak mengabaikan piawaian daripada konteks amalan tempatan yang lebih bersifat praktikal dan mampu mengatasi pencapaian berdasarkan piawaian di peringkat antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN SANISVARA NETHAJI RAYER A/L  
RAJAJI [ JELUTONG ]**

**TARIKH : 14 DISEMBER 2020 (ISNIN)**

**SOALAN**

Minta **PERDANA MENTERI** bilakah Kerajaan bercadang untuk menamatkan pembekuan akibat wabak COVID-19 dan membenarkan semula kemasukan pekerja asing terutamanya pembantu rumah di Malaysia.

**JAWAPAN**

**YB DATUK SERI MOHD REDZUAN BIN MD. YUSOF,  
MENTERI DI JABATAN PERDANA MENTERI (TUGAS-TUGAS KHAS)**

**Tuan Yang di-Pertua,**

1. Seperti mana semua maklum, pembukaan semula sekatan kemasukan warga asing ke dalam negara yang dilaksanakan oleh Jabatan Imigresen Malaysia (JIM) adalah tertakluk kepada keputusan kerajaan yang dibuat semasa mesyuarat jawatankuasa Strategik Pengurusan Pandemik yang dipengerusikan oleh Menteri Kanan Pertahanan. Keputusan bagi pembukaan kemasukan warga asing daripada pelbagai kategori adalah mengambilkira nasihat dan pendapat yang diberikan oleh Kementerian Kesihatan Malaysia (KKM) berdasarkan keadaan yang dialami oleh negara dalam melawan penularan COVID-19 di negara ini.

2. Kebenaran bagi kemasukan warga asing terutama dalam sektor servis, pembinaan, komersial dan perindustrian adalah bergantung kepada keadaan semasa kes COVID-19 di Malaysia. Jabatan Imigresen Malaysia adalah agensi yang bertanggungjawab dalam pengawalan kemasukan warga asing semasa tempoh Perintah Kawalan Pergerakan (PKP) dalam membanteras penularan COVID-19 di negara ini.

3. Kerajaan memahami keperluan majikan di negara ini dalam sektor-sektor tertentu yang memerlukan kita mengambil pekerja asing sama ada pekerja mahir, separa mahir dan tidak mahir. Dalam hubungan ini, sebarang bentuk keputusan akan melalui proses perbincangan menyeluruh melibatkan pelbagai kementerian dan agensi di peringkat Majlis Keselamatan Negara. Ini supaya sebarang dasar yang ditetapkan serta pelaksanaannya kelak akan mengambil kira segenap sektor dalam negara.

4. Pada masa yang sama, saya juga ingin menggalakkan para majikan supaya memberi peluang dan mengambil pekerja tempatan bagi sama-sama kita membantu rakyat kita sendiri terutamanya yang telah kehilangan pekerjaan akibat daripada kesan penularan pandemik yang berlaku ketika ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHAN MING KAI [ ALOR SETAR ]**

**TARIKH : 14 DISEMBER 2020 ( ISNIN )**

**SOALAN**

Minta **PERDANA MENTERI** menyatakan berapa jumlah penjawat awam dalam setiap kategori pendapatan isi rumah berdasarkan golongan pendapatan Jabatan Statistik (B1-B4, M1-M4, T1-T2) serta jumlah bagi setiap golongan yang telah mendaftar sebagai pembayar cukai LHDN.

**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

**Tuan Yang di-Pertua,**

1. Untuk makluman Ahli-ahli Yang Berhormat, Survei Pendapatan & Perbelanjaan Isi Rumah dan Kemudahan Asas (HIES & BA) dilaksanakan oleh Jabatan Perangkaan Malaysia dengan kekerapan dua kali bagi setiap lima tahun dan yang terkini adalah bagi 2019.
2. Maklumat penjawat awam merujuk kepada ketua isi rumah (KIR) yang pekerjaannya adalah di sektor awam. Dapatan HIES & BA 2019 menunjukkan 12.5 peratus atau 917.6 ribu daripada 7.3 juta isi rumah di Malaysia terdiri daripada isi rumah yang KIR adalah penjawat awam. 20.7 peratus isi rumah berada dalam kumpulan isi B40, iaitu pendapatan isi rumah kurang daripada RM4,850 sebulan. Kira-kira 51 peratus isi rumah dengan KIR penjawat awam berada di dalam kumpulan isi rumah M40, iaitu pendapatan isi rumah antara RM4,850 hingga RM10,959 sebulan dan bakinya 28.3 peratus isi rumah dengan ketua sebagai penjawat awam berada di dalam kumpulan isi rumah T20, iaitu pendapatan RM10,960 sebulan dan lebih.
3. Namun, sebarang andaian dan rumusan daripada data ni perlu dibuat berhati hati memandangkan pendapatan yang dinyatakan adalah berdasarkan pendapatan isi rumah dimana KIR adalah penjawat awam dan bukannya pendapatan individu. Pendapatan merangkumi gaji, elaun, pendapatan daripada pelaburan dan aset serta kerja-kerja sampingan.
4. Semakan dengan pihak Jabatan Akauntan Negara pula menunjukkan sejumlah 586,388 penjawat awam adalah pembayar cukai pendapatan aktif.

Sekian, terima kasih.